

MESYUARAT PERTAMA, PENGGAL KEDUA
PARLIMEN KELIMA BELAS
2023

HARI RABU : 15 FEBRUARI 2023

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 63)**

****SOALAN NO 21 AKAN DIJAWAB OLEH KEMENTERIAN
PADA 2 MAC 2023**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN (MUAR)**

TARIKH : 15 FEBRUARI 2023 (RABU)

SOALAN

TUAN SYED SADDIQ BIN SYED ABDUL RAHMAN (MUAR) minta **MENTERI BELIA DAN SUKAN** menyatakan adakah Kerajaan berhasrat untuk menjalankan dan menguatkuasakan program *internship* berbayar dalam sektor swasta sama seperti apa yang dilakukan dalam sektor Kerajaan pada tahun 2018/2019.

JAWAPAN

Tuan Yang di-Pertua,

1. Pertamanya saya ingin merakamkan ucapan terima kasih kepada Ahli Yang Berhormat Muar yang sentiasa berusaha keras dan prihatin dengan nasib para pelajar yang melakukan latihan industri.
2. Sebagaimana Ahli Yang Berhormat sedia maklum, semenjak 1 September 2019 Kerajaan telah menguatkuasakan kadar baharu pembayaran elaun kepada para pelajar yang menjalani latihan praktikal atau amali di sektor awam. Perkara ini dijelaskan di dalam Surat Pekeliling yang telah dikeluarkan oleh pihak Jabatan Perkhidmatan Awam (JPA) pada 6 September 2019. Ia menjelaskan secara terperinci berhubung aspek pengambilan pelajar, tempoh praktikal dan kadar bayaran elaun kepada para pelajar.
3. Pada masa ini, dasar sedia ada Kerajaan tidak mewajibkan mana-mana syarikat swasta membayar elaun kepada pelajar di dalam program latihan industri. Walau bagaimanapun, Kerajaan amat menggalakkan agar syarikat swasta mencontohi sektor kerajaan untuk turut melaksanakan pembayaran elaun kepada para pelajar yang sedang menjalani latihan industri. Perkara berkenaan ini juga pernah dinyatakan dalam pembentangan Bajet 2022 yang menggesa sektor swasta agar turut membayar elaun sama seperti sektor awam.
4. Dalam konteks ini juga, pertimbangan untuk menguatkuasakan pemberian elaun latihan industri oleh pihak swasta perlu diteliti dari pelbagai aspek. Umum sedia maklum negara kita sedang dalam proses pemulihan dalam semua industri akibat pandemik COVID-19. Sudah tentu untuk menguatkuasakannya juga akan menambah beban kepada industri. Contoh terbaik yang boleh diambil ialah penetapan gaji minimum pada kadar RM1,500 yang mana pematuhan berkaitan juga merupakan cabaran utama yang dihadapi oleh pihak swasta.
5. Pada masa yang sama jumlah para pelajar yang memerlukan latihan adalah besar. Dengan mewajib dan menguatkuasakan pihak swasta untuk memberi elaun latihan hanya akan menghadkan jumlah

NO. SOALAN : 11

pelajar untuk menjalani latihan industri yang sepatutnya mereka lalui semasa pengajian.

6. Untuk makluman Ahli Yang Berhormat juga, Kerajaan melalui TalentCorp telah melaksanakan **Program Latihan Industri Berstruktur (MySIP) Nasional** bermula tahun 2012 hingga kini sebagai program intervensi untuk melahirkan bakat muda sedia-industri melalui pendedahan awal kepada persekitaran pekerjaan sebelum graduasi.

7. Di bawah program ini, elaun bulanan untuk pelajar Sijil Kemahiran Malaysia (SKM) tahap 1 hingga 5 dan Diploma adalah bermula dari RM500.00 sebulan, manakala bagi pelajar ijazah sarjana muda dan ijazah sarjana elaun minima yang diterima adalah sebanyak RM600.00 sebulan. Bermula tahun 2012 sehingga Disember 2022, seramai 111,326 orang pelajar telah mendapat manfaat daripada program MySIP ini.

8. Pihak Kementerian bersedia untuk bekerjasama dengan Kementerian-kementerian berkenaan untuk mengkaji perkara ini dengan lebih terperinci bagi memastikan golongan pelajar terus diberi perhatian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : TUAN IR. TS. HAJI KHAIRIL NIZAM BIN KHIRUDIN
[JERANTUT]**

TARIKH : 15 FEBRUARI 2023 (RABU)

SOALAN

TUAN IR. TS. HAJI KHAIRIL NIZAM BIN KHIRUDIN [JERANTUT] minta **MENTERI PERUMAHAN DAN KERAJAAN TEMPATAN** menyatakan adakah Kerajaan bercadang menyeragamkan penggunaan aplikasi dalam talian untuk pembayaran tiket parkir kereta secara dalam talian di setiap PBT seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat, pendigitalan atau pengendalian transaksi secara dalam talian merupakan inisiatif berterusan Kementerian Pembangunan Kerajaan Tempatan (KPKT) untuk meningkatkan penyampaian perkhidmatan Pihak Berkuasa Tempatan (PBT) khususnya bagi memudahkan orang ramai berurusan dan membuat transaksi secara dalam talian.

Buat masa ini, penggunaan aplikasi untuk pembayaran tiket parkir kereta secara dalam talian di PBT adalah mengikut kaedah sistem dalam talian sedia ada yang dibangunkan oleh PBT masing-masing. Terdapat juga PBT yang mengambil inisiatif mewujudkan kerjasama dengan syarikat konsesi supaya kos ditanggung sepenuhnya oleh syarikat konsesi dalam suatu tempoh yang telah dipersetujui bersama. Di samping itu, terdapat PBT yang masih melaksanakan kutipan pembayaran parkir kereta secara manual melalui kiosk/ kaunter pembayaran.

KPKT menyedari akan keperluan ini sebagai satu kemudahan bagi rakyat. Dalam hal ini, KPKT akan terus menggiatkan perancangan dan inisiatif ke arah penyeragaman satu aplikasi untuk pembayaran tiket parkir kereta bagi semua PBT. Inisiatif untuk penyeragaman ini akan melibatkan 155 PBT. Oleh itu, perancangannya memerlukan penelitian yang terperinci dan satu tempoh masa yang bersesuaian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATUK SUHAIMI BIN NASIR
[LIBARAN]**

TARIKH : 15 FEBRUARI 2023 (RABU)

SOALAN

DATUK SUHAIMI BIN NASIR minta **MENTERI KESIHATAN** menyatakan adakah pihak Kementerian mempunyai perancangan bagi menangani masalah kekurangan fasiliti kesihatan di kawasan luar bandar negeri Sabah dan Sarawak.

JAWAPAN

Tuan Yang di-Pertua,

1. Kementerian Kesihatan Malaysia (KKM) sedia maklum bahawa masih terdapat jurang dalam penyediaan fasiliti kesihatan di negeri Sabah dan Sarawak khususnya di kawasan luar bandar. Antara pendekatan yang diambil oleh KKM untuk menangani isu ini adalah:

- (i) menaik taraf hospital-hospital sedia ada bagi menyokong dan memperkasakan perluasan program kluster hospital, inisiatif *global surgery* dan perkhidmatan kepakaran; dan
- (ii) mengkaji kesesuaian sama ada untuk menaik taraf atau menggantikan fasiliti klinik sedia ada kepada klinik kesihatan komprehensif.

2. KKM juga akan menambah bilangan klinik kesihatan di kawasan

SOALAN NO : 13

luar bandar di Sabah dan Sarawak melalui permohonan dan pembinaan projek-projek klinik kesihatan yang sedang dilaksanakan di bawah RMKe-12 iaitu:

(a) Fasa permohonan:

- (i) Sabah : 5 projek
- (ii) Sarawak : 3 projek

(b) Fasa pembinaan:

- (i) Sabah : 7 projek
- (ii) Sarawak : 14 projek

3. Penambahan bilangan klinik kesihatan yang sedang dalam fasa permohonan dan pembinaan ini telah mengambil kira ketersediaan tapak, perkembangan penduduk, pertambahan beban penyakit, keutamaan pelaksanaan dan ketersediaan peruntukan Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATUK HAJI AWANG BIN HASHIM
[PENDANG]**

TARIKH : 15 FEBRUARI 2023 (RABU)

SOALAN

DATUK HAJI AWANG BIN HASHIM [PENDANG] minta **MENTERI KEMAJUAN DESA DAN WILAYAH** menyatakan tindakan dalam menangani kegusaran rakyat di kawasan luar bandar mengenai isu kesempitan hidup lebih-lebih lagi dengan peningkatan harga barangan keperluan harian di samping ketidaktentuan harga getah.

JAWAPAN

Tuan Yang di-Pertua,

Untuk makluman Yang Berhormat, Kementerian Kemajuan Desa dan Wilayah (KKDW) berperanan untuk membantu meningkatkan pendapatan penduduk luar bandar dalam usaha untuk mengatasi peningkatan kos sara hidup.

Dalam hal ini, KKDW telah mengambil beberapa pendekatan untuk meningkatkan pendapatan penduduk luar bandar termasuk melalui pelaksanaan **Program Peningkatan Pendapatan (PPP)**. Melalui program ini **golongan miskin, miskin tegar dan B40 akan menerima latihan dan peralatan sehingga RM10,000** untuk menjalankan projek-projek ekonomi bagi **meningkatkan pendapatan sekurang-kurangnya 30 peratus daripada pendapatan asal**. Di bawah RMKe-11 seramai 3,896 orang dan di bawah RMKe-12 (2021 hingga 2022) seramai 1,881 peserta telah menerima manfaat. Untuk tahun 2023, sebanyak RM6 juta telah diperuntukkan melalui Bajet Mini dengan sasaran peserta seramai 570 orang.

Selain PPP, KKDW turut melaksanakan Program Latihan Kemahiran dan Kerjaya (PLKK) iaitu program latihan jangka pendek khususnya kumpulan B40 di luar bandar, **yang mempunyai jaminan kerjaya selepas tamat kursus**. Di bawah RMKe-11, seramai 11,269 orang dan di bawah RMKe-12 seramai 4,426 orang telah mengikuti program ini **dengan 80% peserta mendapat pekerjaan selepas tamat program**. Untuk tahun 2023, sebanyak RM5 juta telah diperuntukkan dengan sasaran peserta seramai 1,000 orang (peruntukan dan sasaran peserta ini adalah berdasarkan Mini Bajet yang dibentangkan pada 20 Disember 2022 yang lalu).

Selain itu, terdapat pelbagai program keusahawanan luar bandar yang dilaksanakan oleh KKDW dan agensi-agensi di bawah KKDW untuk meningkatkan pendapatan dan taraf hidup penduduk luar bandar seperti Program *Start Right*, Aktiviti Ekonomi Tambahan, Quick Win KEMAS dan DesaMall@KKDW.

Untuk pekebun kecil getah, Kerajaan melalui Kementerian ini telah meluluskan pemberian wang tunai iaitu Bantuan Musim Tengkujuh (BMT), sebanyak RM254,913,600.00 kepada seramai 318,642 orang pekebun kecil dan penoreh yang terjejas pendapatan semasa musim tengkujuh.

Bantuan BMT ini adalah sejumlah RM800 seorang dibayar secara ansuran iaitu sebanyak RM300 sebulan bagi 2 bulan pada November dan Disember 2023 serta RM200 pada Januari 2024. Ini merupakan kenaikan RM200 berbanding BMT pada tahun 2021 yang berjumlah RM600.

Selain itu, RISDA turut melaksanakan projek Aktiviti Ekonomi Tambahan yang menyediakan kemudahan bantuan keperluan perniagaan untuk menjalankan pembangunan produk / perkhidmatan yang berpotensi untuk menambah pendapatan pekebun kecil getah.

Bagi tahun 2021, seramai 1,682 orang usahawan manakala bagi tahun 2022 seramai 2,630 orang usahawan telah mengikuti program AET.

Dalam Bajet Mini 2023, sebanyak **RM12.8 juta diperuntukkan** dengan sasaran peserta **seramai 1,328 orang** (peruntukan dan sasaran peserta ini adalah berdasarkan Mini Bajet yang dibentangkan pada 20 Disember 2022 yang lalu)

Program-program yang telah dinyatakan dapat membantu meningkatkan pendapatan dan sekaligus membantu penduduk luar bandar menangani isu kenaikan kos sara hidup.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : JAWAB LISAN

DARIPADA : TUAN TAN KOK WAI [CHERAS]

TARIKH : 15 FEBRUARI 2023 (RABU)

SOALAN

TUAN TAN KOK WAI [CHERAS] minta **MENTERI SUMBER MANUSIA** menyatakan strategi, insentif dan pencapaian terkini Kerajaan dalam menarik bakat asing bagi memenuhi keperluan pembangunan setiap bidang serta memberi isyarat kepada rakyat Malaysia yang berbakat untuk pulang dari luar negara untuk berkhidmat kepada negara selain menghentikan *brain drain* rakyat Malaysia.

JAWAPAN

Tuan Yang Di Pertua,

Kementerian Sumber Manusia melalui TalentCorp melaksanakan pelbagai **inisiatif pembangunan bakat** termasuk menarik **bakat professional warga Malaysia di luar negara** yang dikenali sebagai **diaspora Malaysia**.

Sejak 2011, lebih dari 10,000 permohonan daripada diaspora Malaysia telah diterima oleh TalentCorp untuk kembali bekerja di tanah air di bawah **Program Kepulangan Pakar atau Returning Expert Program (REP)**. Daripada jumlah itu, lebih dari 6,000 pakar telah diluluskan untuk kembali di bawah program ini.

Selain itu, satu inisiatif strategik yang sedang dibangunkan ialah inisiatif **Malaysia @ Heart atau MyHeart** untuk merealisasikan aspirasi ini. Antara sebab utama pembangunan inisiatif ini adalah untuk menyediakan platform sehenti (*one-stop platform*) yang menghubungkan diaspora dengan tanah air. Berdasarkan kepada hasil dapatan kaji selidik yang telah dilaksanakan dalam kalangan diaspora Malaysia pada awal tahun 2021 di mana **92 peratus** daripada **diaspora bersedia untuk menyumbang kepada negara** dalam pelbagai kapasiti, manakala **85 peratus** diaspora **berhasrat untuk kembali ke Malaysia pada suatu masa akan datang**.

Tuan Yang Di Pertua,

Inisiatif **MyHeart** ini juga bertepatan dengan **Rancangan Malaysia Ke-12** iaitu **mewujudkan platform pengkalan data diaspora**. Platform MyHeart dijangka **dengan izin** akan *go-live* pada Mac 2023 dan akan turut merangkumi pelbagai usaha untuk memudahcara diaspora Malaysia yang merangkumi peluang pekerjaan, **maklumat pasaran kerja pendidikan untuk anak-anak, memudahcara permit masuk pasangan dan anak-anak bukan warga negara**.

Sebagai permulaan kepada pelaksanaan MyHeart, TalentCorp telah melaksanakan *MyHeart Career and Facilitation Fair (MyHeart CaFe)*

SOALAN NO: 15

pada Jun dan Oktober 2022. Setakat ini, seramai 800 diaspora dan 33 syarikat merentasi sektor telah menyertai MyHeart CaFé, antaranya Petronas, CIMB, Bank Negara, lain-lain dengan menawarkan lebih daripada 1500 peluang pekerjaan.

Dalam usaha Kerajaan meningkatkan kualiti bakat tempatan, Kerajaan melalui TalentCorp telah mewujudkan **Residence Pass-Talent (RP-T)**, di mana Ekspatriat yang memenuhi syarat-syarat yang ditetapkan, layak dipertimbangkan untuk pas RP-T.

Untuk makluman Dewan yang Mulia, di bawah pas ini, **insentif** yang diberikan kepada ekspatriat adalah diberi **tempoh pas selama 10 tahun**, yang diperbaharui setiap 5 tahun sekiranya memenuhi syarat-syarat yang ditetapkan. **Pasangan** pemegang pas RP-T **dibenarkan untuk bekerja** di dalam Malaysia tanpa pas pekerjaan. Manakala, **anak-anak dibenarkan bersekolah** di sekolah rendah dan menengah **tanpa memerlukan pas pengajian**.

Berdasarkan statistik, mulai tahun 2011 hingga Januari 2023, seramai **9,450 ekspatriat diluluskan** di bawah **pas RP-T** yang terdiri daripada eksekutif *C-suite* dan pengurusan atasan serta pakar-pakar teknikal yang mempunyai pengalaman melebihi 10 tahun.

Tuan Yang Di Pertua,

Dalam memacu daya saing dan keupayaan inovatif tenaga kerja tempatan, satu jawatankuasa yang dianggotai oleh ekspatriat yang merupakan pemimpin-pemimpin perniagaan daripada pelbagai sektor korporat di Malaysia, dipanggil **Malaysia Global Talent Advisory Group (MyLead)** telah ditubuhkan oleh TalentCorp pada tahun 2021. Melalui MyLead, pemimpin-pemimpin ini akan memberikan input dan cadangan-cadangan untuk mengukuhkan pembangunan bakat tempatan seterusnya memanfaatkan kepakaran ekspatriat ke arah meningkatkan usaha pembinaan negara (*nation building*).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 15 FEBRUARI 2023 (RABU)

SOALAN

TUAN AHMAD FADHLI BIN SHAARI [PASIR MAS] minta **MENTERI KESIHATAN** menyatakan keberkesanan inisiatif hospital kluster yang telah direncanakan oleh Kementerian bagi mengatasi masalah kepadatan pesakit yang terlalu tinggi di hospital-hospital seluruh negara sehingga kini.

JAWAPAN

Tuan Yang di-Pertua,

Hospital Kluster adalah merupakan inisiatif transformasi penyampaian perkhidmatan perubatan yang menggabungkan hospital-hospital berpakar dan tanpa pakar mengikut lokasi geografi yang berdekatan. Setakat kini, kesemua hospital Kementerian Kesihatan Malaysia (KKM) telah melaksanakan inisiatif ini dan jumlah keseluruhan kluster adalah sebanyak 42 buah di seluruh negara. Keberkesanan pelaksanaan Hospital Kluster ini adalah seperti berikut:

- i. perkhidmatan kepakaran dapat diberikan kepada pesakit luar bandar tanpa perlu dirujuk ke hospital berpakar, seterusnya dapat mengurangkan masa menunggu pesakit untuk dilihat oleh doktor pakar. Secara lazimnya, melalui inisiatif Kluster, pakar perubatan dapat ditempatkan di hospital tanpa pakar secara penggiliran bagi tempoh yang lebih lama. Ini membolehkan

hospital tanpa pakar mempunyai perkhidmatan kepakaran dengan pemantauan daripada doktor pakar secara tetap sebagaimana hospital yang mempunyai pakar residen bagi memenuhi keperluan dan memastikan kesinambungan rawatan yang lebih efektif;

- ii. mengurangkan masa menunggu pesakit bagi prosedur kepakaran tertentu yang boleh dijalankan di hospital tanpa pakar seperti pembedahan katarak. Sebagai contoh, Hospital Kluster Tengku Ampuan Najihah (bersama Hospital Tampin dan Hospital Jempol) berjaya mengurangkan masa menunggu pembedahan katarak dari enam minggu kepada empat minggu;
- iii. mengurangkan kesesakan dan kadar penggunaan katil (*bed occupancy rate, BOR*) di hospital *lead* (hospital pakar), seterusnya meningkatkan kadar penggunaan katil (*bed occupancy rate*) di hospital *non-lead* (hospital tanpa pakar). Secara purata, penggunaan katil (BOR) di hospital non-lead telah meningkat kepada 65%;
- iv. perkongsian dan pengoptimuman sumber-sumber seperti sumber manusia, peralatan, fasiliti dan lain-lain dapat dilaksanakan dengan lebih efisien di antara hospital-hospital berkenaan; dan
- v. pengurangan belanja mengurus hospital dengan perolehan secara berpusat di peringkat Hospital Kluster, seperti perolehan ubatan, aset pakai buang (*consumables*) dan penyelenggaraan peralatan perubatan. Ini seterusnya dapat mengurangkan kos merawat pesakit.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATUK SERI PANGLIMA BUNG MOKTAR BIN
RADIN (KINABATANGAN)**

TARIKH : 15 FEBRUARI 2023 (RABU)

SOALAN

**DATUK SERI PANGLIMA BUNG MOKTAR BIN RADIN
(KINABATANGAN)** minta **MENTERI BELIA DAN SUKAN** menyatakan
apakah pendekatan yang sedang dan akan dibuat oleh Kementerian dalam
mendekati golongan belia agar mereka dapat memanfaatkan masa
terluang dengan perkara-perkara berfaedah sekaligus mengelakkan para
belia ini dari terjebak dengan najis dadah ataupun kes-kes jenayah sosial.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Belia dan Sukan (KBS) sentiasa mengambil perhatian serius dalam aspek pembangunan belia. Menyedari hakikat bahawa golongan ini merupakan rakan strategik pembangunan negara, kesemua inisiatif – inisiatif atau program yang dirangka oleh pihak Kementerian menfokuskan aspek penyerlahan bakat dan potensi modal insan belia agar berupaya untuk menyumbang di pelbagai peringkat.
2. Perlaksanaan program-program seumpama ini juga secara tidak langsung dapat memenuhi masa lapang belia dengan aktiiviti berfaedah dan mengelak mereka dari terjerumus dalam aktiviti – aktiviti tidak sihat yang menyumbang kepada peningkatan masalah sosial negara.
3. Pada tahun 2023 ini, hampir 200 kursus atau latihan kemahiran jangka pendek untuk belia dirancang untuk dilaksanakan. Antara program utama yang akan dianjurkan ialah Program ***Skills For Life*** khusus kepada golongan belia. Program baru ini adalah bertujuan untuk menyediakan peluang latihan kemahiran asas kepada belia dengan menggunakan peralatan, kemudahan sedia ada, serta kepakaran tenaga pengajar ILKBS. Antara kursus yang ditawarkan ialah seperti kerja pempaipan, pendandanan dan gunting rambut.
4. Kemahiran yang diperolehi boleh digunakan dalam kehidupan seharian yang mana ia secara tidak langsung membantu menangani kos sara hidup yang tinggi yang dihadapi oleh belia dan masyarakat pada masa kini. Sebanyak 22 program akan dilaksana oleh ILKBS dengan mensasarkan penyertaan seramai 300 orang peserta bagi setiap program. Jumlah keseluruhan peserta ialah 6,600 orang. Program dijalankan dalam tempoh tiga (3) hingga lima (5) jam pada hujung minggu (Jumaat, Sabtu atau Ahad) dan dilaksana di luar ILKBS dengan menggunakan fasiliti di bawah KBS atau lain-lain fasiliti sedia ada yang bersesuaian.

5. Selain dari itu, program-program sedia ada seperti Rakan Muda juga akan turut diberi nafas baharu agar selari dengan minat dan *trend* masa kini. Sebanyak 273 aktiviti telah dirancang untuk dilaksanakan di peringkat kebangsaan, negeri dan daerah dengan sasaran penyertaan seramai 30,000 belia berumur 15 hingga 25 tahun di seluruh negara.

6. Bagi menyantuni para belia yang minat dalam aktiviti rekreasi luar, Kementerian turut menyediakan program Program **Rakan Muda EXXO Camp** (*Explore, Experience, Extreme and Organize*). Program ini menyasarkan golongan belia berisiko berumur 15 hingga 17 tahun yang cenderung terdedah/ terlibat dalam penyalahgunaan dadah, salah laku moral, perbuatan jenayah dan seumpamanya. Program ini dilaksanakan dengan kerjasama Jabatan Pendidikan Negeri, Agensi Anti Dadah Kebangsaan, Polis Diraja Malaysia, Jabatan Kebajikan Masyarakat dan Jabatan Penjara Malaysia.

7. Dalam hal ini juga, pihak Kementerian pada bulan Mac hingga November tahun 2022 telah melaksanakan inisiatif melalui Program Intervensi Sosial seperti program Kem Anak Muda (KAMU); Reben Kuning dan Dari Belia Untuk Belia – Y2Y yang disertai oleh seramai 25,999 orang belia di seluruh negara. Pada tahun ini KBS turut merancang untuk melaksanakan sebanyak 125 aktiviti yang akan digerakkan bersama rakan strategik iaitu Kem Belia Sejahtera; Program Belia Mencegah Ekstremisme; Projek Reben Kuning (Kebangsaan); Inisiatif Intervensi Dari Belia Untuk Belia-Y2Y. Program ini menyasarkan penyertaan belia seramai 30,000 orang belia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 15 FEBRUARI 2023 (RABU)

SOALAN

TUAN CHE ALIAS BIN HAMID [KEMAMAN] minta **MENTERI SUMBER
ASLI, ALAM SEKITAR DAN PERUBAHAN IKLIM** menyatakan status
terkini pelaksanaan projek tebatan banjir di negeri-negeri Pantai Timur.

JAWAPAN

Tuan Yang di-Pertua,

1. Untuk makluman Ahli Yang Berhormat, sebanyak enam (8) projek Rancangan Tebatan Banjir (RTB) untuk Pembangunan Lembangan Sungai Bersepadu (PLSB) berjumlah RM 1.64 billion sedang dilaksanakan iaitu:

- i. Sungai Kelantan Fasa 1, Kelantan berjumlah RM 699 juta;
- ii. Sungai Golok (KESBAN) Fasa 1, Kelantan berjumlah RM 501 juta;
- iii. RTB Sungai Kuantan Fasa 2, Pakej 1 (Sungai Belat), Pahang berjumlah RM 118 juta;
- iv. RTB Sungai Kuantan Fasa 2, Pakej 3, Pahang berjumlah RM 226.5 juta;
- v. RTB Sungai Semantan, Pahang berjumlah RM 47.8 juta;
- vi. RTB Kemasik, Terengganu berjumlah RM 50.6 juta;
- vii. Kontrak PLSB Sungai Kemaman, Terengganu untuk komponen pembinaan lencongan banjir, pembinaan ban binjai dan kerja-kerja berkaitan sedang dinilai oleh Jawatankuasa Rundingan Harga di peringkat kementerian. Kelulusan jawatankuasa ini dijangka akan diterima oleh JPS pada Julai 2023; dan
- viii. Rancangan Tebatan Banjir Bukit Payung, Daerah Marang, Terengganu. Status terkini projek ini adalah diperingkat penyediaan rekabentuk terperinci dan jangkaan rekabentuk siap adalah pada tahun September 2023. Antara skop kerja utama yang terlibat bagi projek ini adalah Menaiktaraf Sungai, Menaiktaraf Lintasan dan Membina Kolam Takungan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : JAWAB LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 15 FEBRUARI 2023 (RABU)

SOALAN

TUAN HASSAN BIN ABDUL KARIM [PASIR GUDANG] minta **MENTERI SUMBER MANUSIA** menyatakan tindakan Kerajaan jika terdapat majikan sengaja melanggar Akta Kerja 1955 (Pindaan) 2022 yang berkuat kuasa sekarang dengan tidak melaksanakan waktu kerja yang dikurangkan kepada 45 jam seminggu.

JAWAPAN

Tuan Yang di-Pertua,

Akta Kerja (Pindaan) 2022 berkuat kuasa mulai 1 Januari 2023. Antara pindaan yang terlibat ialah pengurangan waktu bekerja daripada 48 jam kepada 45 jam seminggu. Waktu bekerja seminggu dikurangkan supaya ianya selaras saranan Pertubuhan Buruh Antarabangsa melalui *Reduction of Hours of Work Recommendation*, 1962 (No. 116) yang mengesyorkan negara-negara yang mengamalkan waktu bekerja 48 jam seminggu supaya mengambil langkah bagi **mengurangkan waktu kerja tanpa melibatkan pengurangan gaji.**

Kementerian Sumber Manusia (KSM) melalui Jabatan Tenaga Kerja Semenanjung Malaysia (JTKSM) akan menjalankan pemeriksaan berkanun daripada semasa ke semasa bagi memastikan pematuhan majikan terhadap pindaan akta ini. Bagi **tempoh Januari 2023**, JTKSM telah menjalankan **pemeriksaan berkanun** ke atas **2,389 majikan**, rentetan itu sebanyak **317 notis pematuhan telah dikeluarkan terhadap majikan atas pelanggaran Akta Kerja 1955.**

Mana-mana **majikan** yang melakukan sebarang kesalahan atau **melanggar peruntukan Akta Kerja 1955** boleh dikenakan **denda tidak melebihi RM50,000** jika disabitkan kesalahan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : PUAN SITI MASTURA BINTI
MUHAMMAD [KEPALA BATAS]**

TARIKH : 15 FEBRUARI 2023 (RABU)

SOALAN

YB PUAN SITI MASTURA BINTI MUHAMMAD [KEPALA BATAS]
minta **MENTERI PEMBANGUNAN KERAJAAN TEMPATAN**
menyatakan:

- a) senarai jumlah projek rancangan perumahan sewa beli yang telah dilaksanakan di seluruh negara; dan
- b) jumlah projek rancangan perumahan sewa beli yang telah dilaksanakan di negeri Pulau Pinang.

JAWAPAN

Tuan Yang di-Pertua,

- a) Untuk makluman Ahli Yang Berhormat, Kementerian Pembangunan Kerajaan Tempatan (KPKT) telah memperkenalkan dua (2) program perumahan sewa beli atau skim *Rent-To-Own* (RTO) iaitu RTO Program Perumahan Rakyat (PPR) dan RTO Perbadanan PR1MA Malaysia (PR1MA). Perincian bagi kedua-dua program adalah seperti berikut:

(i) RTO Program Perumahan Rakyat (PPR)

Skim RTO PPR telah diperkenalkan pada tahun 2017 dan merupakan skim pembiayaan mudah, khusus bagi membantu pemilikan rumah golongan B40 yang telah ditawarkan unit PPR tetapi gagal mendapatkan pembiayaan daripada mana-mana institusi kewangan. Skim RTO PPR yang melibatkan 6,066 unit rumah telah dilaksanakan di 14 buah PPR di seluruh negara. Sehingga 31 Disember 2022, sebanyak 4,690 keluarga telah ditawarkan skim RTO PPR di seluruh negara dengan baki 1,376 unit rumah yang masih belum ditawarkan.

(ii) RTO Perbadanan PR1MA Malaysia (PR1MA)

Skim Pembiayaan RTO PR1MA telah diperkenalkan melalui pengumuman Belanjawan Tahun 2021. Melalui skim ini, pembeli mempunyai pilihan untuk menyewa selama lima (5) tahun pertama dengan kadar sewa yang berpatutan sebelum membeli rumah tersebut dengan pembiayaan penuh. Skim RTO ini dibuka kepada semua bakal pembeli rumah PR1MA bagi projek yang terpilih sama ada dalam pelaksanaan atau telah siap dibina di seluruh negara. Sehingga 31 Januari 2023, sebanyak 16 projek di bawah skim RTO PR1MA telah ditawarkan.

- b) Untuk makluman Ahli Yang Berhormat, buat masa ini hanya terdapat satu (1) PPR di bawah Skim RTO di Pulau Pinang iaitu PPR Tok Suboh dengan jumlah pengisian sebanyak 271 unit (100%). Setakat ini PR1MA tidak menawarkan skim RTO bagi Projek PR1MA di Pulau Pinang.

Sekian, terima kasih.

****SOALAN NO 21 AKAN DIJAWAB OLEH
KEMENTERIAN PADA 2 MAC 2023**

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATO' SRI DR. WEE JECK SENG
[TANJUNG PIAI]**

TARIKH : 15 FEBRUARI 2023 (RABU)

SOALAN

DATO' SRI DR. WEE JECK SENG [TANJUNG PIAI] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah langkah yang diambil untuk menyelesaikan masalah banjir yang diakibatkan oleh pintu air yang tidak berfungsi dan rosak yang juga berperanan menjadi laluan penghubung jalan semasa pelaksanaan Projek Johor Barat sama ada dibina semula atau digantikan dengan jambatan.

JAWAPAN

Tuan Yang di-Pertua,

1. Untuk makluman Yang Berhormat, Projek Johor Barat adalah di bawah bidang kuasa Kerajaan Negeri Johor. Jabatan Pengairan dan Saliran (JPS) bertindak sebagai agensi pelaksana untuk kerja-kerja penyenggaraan saliran, manakala Kementerian Pertanian dan Keterjaminan Makanan (MAFS) berperanan untuk melaksanakan sistem pengairan dan saliran ke kawasan-kawasan pertanian terutamanya di kawasan luar bandar.
2. Bagi Projek Johor Barat, JPS Negeri Johor telah membuat tinjauan dan mendapati struktur kawalan pengairan tidak berfungsi dan menyebabkan aliran parit menjadi kecil serta ia juga berperanan menjadi laluan penghubung jalan. Sehubungan itu, JPS Negeri Johor akan menaiktaraf kawalan saliran di kawasan tersebut.
3. Kerajaan Negeri Johor melalui JPS Negeri Johor juga turut melaksanakan projek Kajian Semula Rancangan Johor Barat berjumlah RM 800 ribu yang dijangka siap pada Mac 2023. Hasil kajian ini dijangka dapat menyelesaikan secara keseluruhan banjir di kawasan Johor Barat termasuk projek tersebut serta masalah hakisan pantai dan penerobosan air masin.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

DARIPADA : DR. HAJAH HALIMAH ALI [KAPAR]

TARIKH : 15 FEBRUARI 2023 (RABU)

SOALAN

DR. HAJAH HALIMAH ALI [KAPAR] minta **MENTERI KESIHATAN** menyatakan apakah tindakan Kementerian untuk memupuk budaya makanan sihat termasuk di kalangan peniaga dan pembeli makanan agar jumlah pesakit diabetes dalam kalangan rakyat Malaysia dapat dikurangkan.

JAWAPAN

Tuan Yang di-Pertua,

1. Tinjauan Kesihatan dan Morbiditi Kebangsaan yang dijalankan oleh Kementerian Kesihatan Malaysia mendapati bahawa, prevalens diabetes telah meningkat secara signifikan dalam kalangan orang dewasa berumur 18 tahun dan ke atas iaitu 11.6% pada tahun 2006 kepada 15.2% pada tahun 2011, 17.5% pada tahun 2015 kepada 18.3% pada tahun 2019. Justeru, KKM sentiasa berusaha mempelbagaikan usaha untuk memupuk budaya pemakanan sihat dalam kalangan masyarakat. Antara usaha yang dijalankan adalah seperti yang berikut:

Industri makanan & minuman/peniaga makanan

- i. Menjalankan **Latihan Katering Sihat (LKS)** kepada pengusaha dan pengendali makanan di premis makanan yang bertujuan meningkatkan tahap pengetahuan dan kemahiran pengendali makanan mengenai penyediaan hidangan yang sihat dan selamat.
- ii. Melaksanakan inisiatif **MyChoice** dan **MyMeal** kepada rangkaian restoran termasuk restoran francais, syarikat makanan segera dan syarikat persendirian. Pengiktirafan ini diberi kepada menu yang memenuhi kriteria nilai ambang kandungan gula, garam dan kalori yang telah ditetapkan dan merupakan pilihan yang lebih sihat di restoran tersebut.
- iii. Melaksanakan Inisiatif **Healthier Choice Logo (HCL)** dengan penyertaan secara sukarela daripada syarikat – syarikat pengeluar makanan dan minuman di Malaysia. Sehingga kini, sebanyak 606 produk makanan dan minuman yang telah direformulasikan dan mendapat logo HCL yang merupakan pilihan sihat bagi rakyat Malaysia.
- iv. **Mengenakan duti eksais terhadap minuman manis bergula ready-to-drink (RTD)** berkuatkuasa pada 1 Julai 2019 pada kadar 40 sen seliter bagi tiga kategori minuman iaitu minuman berkarbonat dan tidak berkarbonat, minuman berasaskan susu

serta jus buah-buahan dan sayur-sayuran. Seterusnya, **skop pengenaan duti eksais ini telah diperluas bagi meliputi penyediaan pra-campuran** yang berasaskan coklat atau koko, malta, kopi dan teh seperti minuman pra-campuran 2 dalam 1 atau 3 dalam 1 seperti yang telah diumumkan dalam Pembentangan Bajet 2022.

- v. Mengeluarkan **Garis Panduan Kawalan Pengiklanan Makanan dan Minuman yang Tinggi Kandungan Lemak, Garam dan Gula di Malaysia** sebagai rujukan kepada semua syarikat penyiaran bagi mengawal pengiklanan dan lain-lain bentuk pemasaran makanan dan minuman tinggi lemak/gula yang menarik minat kanak-kanak.
- vi. Mengadakan **rundingan secara berkala** dengan pihak industri makanan termasuk pengusaha-pengusaha rangkaian makanan segera untuk menggalakkan penghasilan/ reformulasi produk makanan dan minuman yang rendah kandungan gula, garam, lemak dan tinggi serat.

Pengguna

- i. Menjalankan **Kempen Kesedaran Kalori** bagi memberi kesedaran dan maklumat pemakanan yang betul kepada pengguna melalui inisiatif seperti pelabelan kalori di premis makanan dan minuman di kawasan Rehat & Rawat (R&R) Lebuhraya Malaysia dan premis makanan yang diiktiraf BeSS atau “Bersih, Selamat dan Sihat”.
- ii. Melaksanakan **Inisiatif Kafeteria Sihat** yang menyediakan pilihan makanan dan minuman yang sihat dan mengutamakan cara penyediaan hidangan yang lebih sihat di premis makanan termasuk di institut pengajian tinggi dan tempat kerja.
- iii. Melaksanakan **Advokasi Membaca Label pada produk makanan dan minuman** melalui pelbagai platform bagi meningkatkan pemahaman pengguna mengenai maklumat pemakanan dan ramuan bagi memilih produk yang sihat.

- iv. Melaksanakan **Kempen Kurangkan Gula** bagi membantu pengguna memahami kesan pengambilan gula secara berlebihan terhadap kesihatan dan kaedah mengurangkan kandungan gula dalam penyediaan makanan serta minuman.
- v. Melaksanakan **Kempen Minum Air Kosong** di setiap peringkat termasuk institusi pendidikan awal kanak-kanak dan sekolah di bawah KPM, institusi pengajian tinggi, tempat kerja dan komuniti.
- vi. Melaksanakan aktiviti advokasi pemakanan sihat di **Pusat Maklumat Pemakanan** secara fizikal dan di atas talian melalui laman rasmi media sosial KKM serta aktiviti praktikal penyediaan hidangan sihat termasuk modifikasi resipi di **Dapur Sihat Masyarakat**.
- vii. Melaksanakan **aktiviti saringan kesihatan dan intervensi bagi menangani penyakit tidak berjangkit di peringkat komuniti seperti program Komuniti Sihat Pembina Negara (KOSPEN)** bagi menggalakkan penglibatan komuniti dalam mengambil tanggungjawab terhadap kesihatan diri, mengenal pasti risiko penyakit dan penyakit di peringkat awal serta mendapatkan rawatan yang sewajarnya agar penyakit dalam keadaan terkawal.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN
DARIPADA : TUAN ZAHIR BIN HASSAN
[WANGSA MAJU]
TARIKH : 15 FEBRUARI 2023 (RABU)

SOALAN

TUAN ZAHIR BIN HASSAN [WANGSA MAJU] minta **MENTERI KESIHATAN** menyatakan:-

- (a) apakah rancangan segera Kementerian terhadap pengambilan dan mengisi kekosongan Pegawai Perubatan Latihan Siswazah (*Houseman*) memandangkan kekosongan ketara kini menyebabkan tugas tersebut terpaksa dipikul oleh para doktor pakar, doktor serta jururawat; dan
- (b) adakah rancangan Kementerian untuk meningkatkan tahap penyelenggaraan hospital-hospital awam.

JAWAPAN

Tuan Yang di-Pertua,

1. Pada masa ini, Kementerian Kesihatan Malaysia (KKM) melaksanakan pelantikan graduan perubatan untuk menjalani latihan siswazah di 49 Hospital Latihan Siswazah (HLS) seluruh negara sebagai Pegawai Perubatan Siswazah (PPS).

2. Sebanyak 12,228 slot latihan siswazah disediakan di seluruh negara. Daripada jumlah tersebut sebanyak 7,576 atau 62 peratus slot latihan sedang diisi oleh PPS. Manakala, kekosongan slot latihan sebanyak 4,652 adalah disebabkan PPS telah menamatkan latihan, meletak jawatan atau ditamatkan perkhidmatan. Berdasarkan rekod KKM terdahulu, slot latihan siswazah telah diisi penuh oleh PPS bagi menjalani latihan siswazah berikutan keluaran graduan yang meningkat, namun terdapat penurunan keluaran graduan pada tahun 2022 iaitu seramai

4,875 graduan perubatan berbanding 8,511 graduan perubatan pada tahun 2019. Ini adalah berikutan penangguhan pengajian oleh pelajar perubatan yang tidak dapat melengkapkan pengajian dalam masa yang ditetapkan.

3. KKM melaksanakan pengambilan graduan perubatan sebanyak enam (6) kali setahun yang dilaksanakan secara berkala iaitu setiap dua (2) bulan dengan unjuran pengambilan seramai 4,000 graduan perubatan setahun. Kesemua graduan perubatan yang telah berdaftar dengan *Malaysian Medical Council* (MMC) dan melepasi tapisan Suruhanjaya Perkhidmatan Awam (SPA) akan terus dilantik tanpa melalui proses temuduga untuk menjalani latihan di HLS.

4. Bagi mengisi kekosongan slot latihan tersebut, seramai 1,764 graduan perubatan yang telah melepasi tapisan SPA akan ditawarkan penempatan latihan siswazah pada suku tahun pertama dan kedua tahun 2023. Kementerian Kesihatan menjangkakan pertambahan pengambilan PPS bagi kohort seterusnya berdasarkan kepada 1,954 graduan perubatan yang telah diberikan surat nombor rujukan permohonan pekerjaan SPA oleh MMC. Pengambilan graduan perubatan ini seterusnya adalah tertakluk kepada permohonan melalui sistem SPA9 dan tapisan oleh SPA.

Tuan Yang di-Pertua,

5. Berhubung program penyelenggaraan di hospital-hospital awam, program ini telah dilaksanakan oleh syarikat penyelenggaraan yang dilantik oleh KKM melalui kontrak Perkhidmatan Sokongan Hospital (PSH). Prestasi pihak syarikat sentiasa dinilai berdasarkan petunjuk prestasi yang telah ditetapkan dalam kontrak.

6. Bagi memastikan tahap penyelenggaraan hospital Kementerian berada di tahap yang terbaik, pemantauan yang berterusan sentiasa dilaksanakan oleh Kementerian terhadap perkhidmatan yang diberikan oleh pihak syarikat.

7. Sekiranya didapati terdapat kelemahan dalam sesuatu perkhidmatan oleh pihak syarikat, surat teguran, perbincangan susulan dan cadangan penyelesaian untuk menambah baik tahap perkhidmatan penyelenggaraan di hospital/ institusi yang terlibat akan dibuat untuk memastikan pengoperasian di hospital/ institusi tidak terjejas.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

**DARIPADA : YB PUAN SYERLEENA ABDUL RASHID
[BUKIT BENDERA]**

TARIKH : 15 FEBRUARI 2023 (RABU)

SOALAN

PUAN SYERLEENA BINTI ABDUL RASHID [BUKIT BENDERA] minta **MENTERI DALAM NEGERI** menyatakan maklumat terkini mengenai siasatan yang dijalankan terhadap insiden di Pusat Tahanan Imigresen sementara Sungai Bakap pada 20hb April 2022, yang telah menyebabkan kematian tujuh individu, termasuk informasi mengenai pihak berkuasa yang menjalankan siasatan, kaedah yang digunakan, hasil siasatan, dan juga tindakan yang diambil.

JAWAPAN

Tuan Yang Di Pertua,

Untuk makluman Yang Berhormat, insiden di Depot Imigresen Sementara Sungai Bakap yang berlaku pada 20 April 2022 melibatkan 528 orang tahanan etnik Rohingya yang melarikan diri dari depot imigresen tersebut.

Hasil operasi pencarian dengan kerjasama pihak Polis DiRaja Malaysia (PDRM) telah berjaya menangkap semula sejumlah 461 orang terdiri daripada 331 orang dewasa dan 130 orang kanak-kanak. Manakala seramai 6 orang tahanan telah meninggal dunia akibat kemalangan jalanraya semasa melarikan diri. Kesemua tahanan yang telah dapat dikesan dan dijumpai semula dalam insiden tersebut telah dipindahkan ke depot imigresen lain. Namun, usaha-usaha untuk mengesan seramai 61 orang tahanan masih diteruskan sehingga sekarang.

Pihak PDRM telah melaksanakan siasatan ke atas tahanan yang terlibat dengan kes lari dari Depot Imigresen Sementara Sungai Bakap. Pihak PDRM memaklumkan siasatan untuk kes ini telah lengkap dan kesemua tahanan yang terlibat akan dituduh di mahkamah pada masa terdekat.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

DARIPADA : YB DATUK ALI BIJU [SARATOK]

TARIKH : 15 FEBRUARI 2023 (RABU)

SOALAN

DATUK ALI ANAK BIJU [SARATOK] minta **MENTERI DALAM NEGERI** menyatakan :

- (a) status dan perancangan pihak Kementerian berkenaan dengan keperluan pembinaan baru Ibu Pejabat Polis (IPD) Saratok, bagi menggantikan IPD sekarang yang telah beroperasi sejak tahun 1954; dan
- (b) berapa peruntukan dan di manakah lokasi tapak tersebut.

JAWAPAN

Tuan Yang Di Pertua,

Buat masa ini, perancangan untuk membina baharu Ibu Pejabat Polis Daerah (IPD) Saratok tidak disenaraikan dalam Pelan Tindakan Pembangunan Strategik PDRM (PSPDRM) tahun 2021 hingga 2025.

Namun pihak Kementerian dan Polis Diraja Malaysia (PDRM) akan mempertimbangkan pembinaan kemudahan ini dalam tempoh terdekat.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI [JELUTONG]**

TARIKH : 15 FEBRUARI 2023 (RABU)

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI DALAM NEGERI** menyatakan langkah-langkah yang telah diambil untuk mengkaji semula peruntukan-peruntukan di bawah Akta Kesalahan Keselamatan (Langkah-Langkah Khas) 2012 (Akta 747) SOSMA yang telah menerima kecaman orang awam kerana menafikan hak asasi rakyat Malaysia di bawah Perlembagaan Persekutuan.

JAWAPAN

Tuan Yang Di Pertua,

SOSMA 2012 merupakan undang-undang berbentuk prosedur yang digunakan untuk kesalahan-kesalahan keselamatan spesifik dan ada diperincikan dalam Jadual Pertama SOSMA 2012. Kerajaan berpandangan bahawa undang-undang keselamatan yang berada di bawah tanggungjawab Kementerian ini termasuklah Akta Kesalahan Keselamatan (Langkah-langkah Khas) 2012 atau SOSMA masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang berkenaan agar tindakan segera boleh diambil untuk mengelakkan sebarang kegentaran awam dan ancaman kepada kedaulatan negara dan kesejahteraan rakyat.

Walaupun begitu, Kementerian komited untuk menambahbaik undang-undang tersebut bagi memastikan keamanan dan keselamatan Negara sentiasa terpelihara, namun ia harus diimbangi dengan hak masyarakat serta kepentingan dan ketenteraman negara. Dalam melaksanakan penambahbaikan terhadap undang-undang tersebut, pihak Kementerian telah mengadakan perbincangan dan bengkel dalaman untuk melihat cadangan penambahbaikan. Pihak berkepentingan termasuklah pertubuhan bukan kerajaan, pakar akademik, komuniti dan sebagainya akan dilibatkan dalam sesi pengumpulan maklum balas terhadap cadangan penambahbaikan tersebut.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

DARIPADA : TUAN AZLI BIN YUSOF (SHAH ALAM)

TARIKH : 15 FEBRUARI 2023 (RABU)

SOALAN

TUAN AZLI BIN YUSOF (SHAH ALAM) minta **MENTERI BELIA DAN SUKAN** menyatakan rancangan dan inisiatif Kementerian mengurangkan jurang teknologi dan fasiliti sukan di setiap negeri agar semua atlet dapat akses dan kemudahan yang adil dan sama rata.

JAWAPAN

TUAN AZLI BIN YUSOF (SHAH ALAM)

Tuan Yang di-Pertua,

1. Untuk makluman Ahli Yang Berhormat, Kementerian Belia dan Sukan (KBS) sememangnya sentiasa mengambil berat dalam aspek aksesibiliti kemudahan sukan di negara ini. Ini terbukti apabila KBS meletakkan peningkatan aksesibiliti dan tadbir urus prasarana sukan sebagai salah satu strategi di bawah Hab Sukan dalam enam (6) teras utama Visi Sukan Negara 2030. Dalam hal ini adalah menjadi fokus utama Kementerian agar semua rakyat mempunyai akses kepada kemudahan sukan di negara ini.

2. Sungguhpun begitu, pembangunan sesebuah kemudahan sukan melibatkan peruntukan yang besar dan pihak KBS mempunyai peruntukan yang sangat terhad untuk memenuhi setiap permohonan untuk membina kemudahan sukan yang baru di setiap negeri saban tahun.
3. Tanggungjawab untuk menyediakan akses kemudahan sukan kepada rakyat termasuk golongan atlet harus dipikul oleh semua pihak termasuk Kerajaan Negeri khususnya Pihak Berkuasa Tempatan. Perancangan agenda pembangunan sukan di setiap negeri perlulah lebih tersusun dan perlu ada perancangan khusus atau model baharu berkenaan pembangunan kemudahan sukan di setiap negeri. Kaedah kebergantungan hanya kepada dana Kerajaan Persekutuan juga adalah tidak sesuai dan tidak progresif untuk dipraktikkan.
4. Oleh yang demikian, saya ingin mengajak semua Kerajaan Negeri khususnya Pihak Berkuasa Tempatan untuk sama-sama pihak Kementerian menyahut seruan ini dan berganding bahu untuk memastikan aksesibiliti yang lebih luas dapat dinikmati oleh semua lapisan masyarakat di negara ini.
5. Untuk makluman Ahli Yang Berhormat juga, pihak Kementerian juga dalam tindakan untuk membangunkan satu pengkalan data komprehensif yang mempunyai maklumat infrastruktur dan kemudahan sukan di seluruh Malaysia. Seterusnya, Kementerian juga berhasrat untuk menyediakan platform tempahan kemudahan-kemudahan ini secara atas talian pada masa akan datang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATUK HAJI AHMAD AMZAD BIN
MOHAMED @ HASHIM
[KUALA TERENGGANU]**

TARIKH : 15 FEBRUARI 2023 (RABU)

SOALAN

**YB DATUK HAJI AHMAD AMZAD BIN MOHAMED @ HASHIM
[KUALA TERENGGANU] minta MENTERI PEMBANGUNAN
KERAJAAN TEMPATAN menyatakan senarai projek-projek perumahan
di bawah tanggungjawab Kementerian yang sedang dan akan
dilaksanakan di Kuala Terengganu.**

JAWAPAN

Tuan Yang di-Pertua,

Untuk makluman Ahli Yang Berhormat, program-program perumahan yang dilaksanakan oleh Kementerian Pembangunan Kerajaan Tempatan (KPKT) di negeri Terengganu adalah seperti berikut:

(1) Program Perumahan Rakyat (PPR)

Terdapat satu projek iaitu Program Perumahan Rakyat (PPR) Padang Hiliran yang merangkumi 1,002 unit rumah telah siap dibina di Terengganu sementara dua lagi projek sedang dalam pembinaan yang merangkumi 950 unit rumah. Terkini, pengisian sebanyak 968 unit di Padang Hiliran telah dilaksanakan dengan baki 34 unit masih kosong.

(2) Program Rumah Mesra Rakyat (RMR)

Program yang dilaksanakan oleh Syarikat Perumahan Negara Berhad (SPNB) ini mampu memberi manfaat kepada golongan B40 yang mempunyai tanah sendiri atau tanah milik ahli keluarga yang diberi kebenaran. Sehingga kini, terdapat 7,542 unit RMR telah siap dibina dan 647 unit dalam pembinaan di negeri Terengganu. Daripada jumlah tersebut, sebanyak 441 unit RMR yang telah siap dibina serta 24 unit dalam peringkat pembinaan adalah di Kuala Terengganu.

(3) Program Perumahan PR1MA

Program ini merupakan program rumah mampu milik (RMM) untuk golongan M40 yang dilaksanakan oleh PR1MA. Untuk makluman Ahli Yang Berhormat, terdapat perancangan untuk

membangunkan satu projek rumah teres PR1MA merangkumi 256 unit di daerah Kemaman. Buat masa ini, PR1MA tiada perancangan untuk membangunkan projek di kawasan Kuala Terengganu.

(4) Kediaman SPNB

Program ini dilaksanakan oleh SPNB dan merupakan program RMM untuk golongan M40. Sehingga kini, sebanyak 70 unit Kediaman SPNB dalam pembinaan di negeri Terengganu. Sebanyak 215 unit Kediaman SPNB sedang dirancang pembinaannya di Kuala Terengganu.

Mengambil kira kedudukan ekonomi semasa, KPKT akan terus berusaha untuk meningkatkan akses terhadap perumahan yang berkualiti dan mampu dimiliki bagi memenuhi keperluan rakyat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

**DARIPADA : YB DATO' HJ. ISMAIL BIN HJ. ABD. MUTTALIB
[MARAN]**

TARIKH : 15 FEBRUARI 2023 (RABU)

SOALAN

DATO' SRI DR. HAJI ISMAIL BIN HAJI ABD. MUTTALIB [MARAN] minta **MENTERI DALAM NEGERI** menyatakan kebanyakan kampung-kampung baru, asalnya dibentuk bagi penempatan semula golongan-golongan yang terlibat dengan komunis, kenapa ianya perlu dikekalkan. Apakah idea-idea komunis masih wujud di kampung-kampung baru dan apakah Kerajaan bercadang untuk menyatukan semua kampung baru di bawah Kementerian yang sama.

JAWAPAN

Tuan Yang Di Pertua,

Kampung Baru yang diwujudkan semasa Era Darurat merupakan strategi ketenteraan di bawah Rancangan Briggs tahun 1950 hingga 1960 bertujuan menangani ancaman pengganas komunis. Dalam tempoh tersebut sebanyak 382 buah Kampung Baru telah diwujudkan, manakala 48 Kampung Baru sedia ada diserap ke dalam Rancangan Briggs dengan jumlah keseluruhan 430 Kampung Baru.

Pada tahun 2009, status Kampung Baru dibahagi kepada 3 kategori iaitu Kampung Baru yang diwujudkan semasa darurat bagi mengatasi ancaman pengganas komunis; Kampung Baru Rangkaian (menempatkan masyarakat Cina di pinggir bandar) dan Kampung Bagan/ Kampung Nelayan (menempatkan masyarakat Cina bekerja sebagai nelayan). Di Semenanjung Malaysia, jumlah Kampung Baru meliputi ketiga-tiga kategori tersebut adalah sebanyak 607 dengan pecahan 450 Kampung Baru; 113 Kampung Baru Rangkaian dan 44 Kampung Bagan. Pada tahun 2015, senarai Kampung Baru dikemaskini menjadikan jumlah keseluruhannya sebanyak 613 dengan pecahan 430 Kampung Baru, 34 Kampung Baru Rangkaian dan 43 Kampung Bagan.

Sementara itu, Kampung Baru komunis diwujudkan di Selatan Thailand setelah PARTI KOMUNIS MALAYSIA (PKMAL) mengadakan perjanjian damai dengan Kerajaan Thailand pada 28 April 1987 dan dengan Kerajaan Malaysia pada 2 Disember 1989. Bagi PKMAL, sebanyak 5 Kampung Baru telah diwujudkan yang dikenali sebagai “Perkampungan Muhibbah” dengan pecahan 3 Kampung Baru di Daerah Betong; 1 di Daerah Sata dan 1 di Daerah Nathawi. Manakala PKM sebanyak 4 Kampung Baru telah diwujudkan yang dikenali sebagai “Perkampungan Aman” dengan pecahan 1 di Daerah Than To; 1 Daerah Betong; 1 Daerah Yaha dan 1 di Daerah Sukhirin.

Idea mewujudkan Kampung Baru di Tanah Melayu semasa Era Darurat bertujuan memutuskan hubungan antaran gerakan bawah tanah komunis atau “Min Yuen” yang berperanan membekalkan logistik dan maklumat kepada gerila pengganas komunis di hutan. Antara tindakan Rancangan Briggs adalah memindahkan penduduk khususnya penduduk Cina dari kawasan terpencil yang bertaburan di pinggir hutan, seterusnya menempatkan mereka di kawasan penempatan semula di Kampung Baru. Dengan tindakan tersebut, gerila pengganas komunis tidak dapat lagi mengugut atau mendapatkan bantuan logistik atau maklumat daripada penduduk Cina tersebut.

Manakala penduduk-penduduk Cina yang dipindahkan ke Kampung Baru semasa era darurat kebanyakannya merupakan mangsa-mangsa keganasan komunis dan mereka BUKAN bekas ahli komunis atau penyokong komunis sehingga kini. Bekas-bekas komunis yang tinggal di negara ini tidak mempunyai perkampungan khas komunis sebagaimana perkampungan komunis di Selatan Thailand. Bekas-bekas komunis yang menetap di Semenanjung Malaysia dan Sarawak dikenalpasti tinggal di luar Kampung-Kampung Baru.

Konsep Kampung Baru yang dilaksanakan semasa Era Darurat telah berjaya mengekang ancaman komunis di negara ini. Mereka yang dipindah dan ditempatkan di Kampung-Kampung Baru khususnya penduduk Cina merupakan mangsa-mangsa keganasan pengganas komunis. Oleh itu, mereka juga benci akan perjuangan komunis yang kejam dan ganas walaupun terhadap masyarakat Cina sendiri.

Tuan Yang Di Pertua,

Berhubung pengekalan dan penyatuan ke semua Kampung-Kampung Baru perlu dirujuk kepada Kementerian Perumahan dan Kerajaan Tempatan (KPKT) yang menyelia ke semua Kampung Baru tersebut ketika ini.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

DARIPADA : YB DATO' HENRY SUM AGONG [LAWAS]

TARIKH : 15 FEBRUARI 2023 (RABU)

SOALAN

DATO HENRY SUM AGONG [LAWAS] minta **MENTERI DALAM NEGERI** menyatakan apakah status terkini pelaksanaan C.I.Q di Sempadan Indonesia dengan Malaysia di Ba'kelalan Lawas, Sarawak.

JAWAPAN

Tuan Yang Di Pertua,

Pos Kawalan Imigresen dan Kuarters Ba'kelalan Lawas, Sarawak

Projek pembinaan Pos dan Kuarters Imigresen Ba'kelalan, Sarawak telah diluluskan di bawah Rancangan Malaysia Ke-10, *Rolling Plan* 4, Tahun 2015 (RMKe-10, RP-4) dengan kos projek semasa sebanyak RM 21,636,261.00.

Kontraktor utama bagi projek ini telah ditamatkan perkhidmatan pada 3 Disember 2020 kerana gagal untuk menyiapkan projek dalam tempoh yang ditetapkan dengan hanya mencapai peratusan kemajuan projek sebanyak 43%. Susulan itu, Kontraktor Penyiap telah dilantik dan tarikh masuk tapak bagi kontrak ini adalah mulai 17 Januari 2023. Projek ini dijangka dapat disiapkan pada 15 Julai 2024.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : JAWAB LISAN

**DARIPADA : DATUK ISKANDAR DZULKARNAIN BIN
ABDUL KHALID [KUALA KANGSAR]**

TARIKH : 15 FEBRUARI 2023 (RABU)

SOALAN

DATUK ISKANDAR DZULKARNAIN BIN ABDUL KHALID [KUALA KANGSAR] minta **MENTERI SUMBER MANUSIA** menyatakan menyatakan sama ada Kerajaan bercadang mengenakan gaji minimum untuk melindungi hak golongan pekerja gig di Malaysia.

JAWAPAN

Tuan Yang di-Pertua,

Tafsiran 'pekerja' sebagaimana peruntukan Akta Majlis Perundingan Gaji Negara 2011 (Akta 732) dan Perintah Gaji Minimum 2022 (PGM 2022) serta merujuk kepada Akta Kerja 1955 (Akta 265), Ordinan Buruh Sabah (Bab 67) dan Ordinan Buruh Sarawak (Bab 76) adalah semua pekerja sektor swasta di bawah satu kontrak perkhidmatan (*contract of service*) kecuali pekerja di bawah kontrak perantisan, pekerja pekhidmat awam persekutuan dan negeri, pekerja badan berkanun dan pihak berkuasa tempatan di Semenanjung Malaysia dan pekhidmat domestik.

Peruntukan di bawah Akta 732 hanya melindungi pekerja sepertimana yang ditafsirkan seperti saya sebut tadi dan sebarang perubahan adalah tertakluk kepada peruntukan akta tersebut.

Namun begitu, Kementerian Sumber Manusia melalui Pertubuhan Keselamatan Sosial (PERKESO) telah menyediakan perkhidmatan perlindungan sosial di bawah Akta Keselamatan Sosial Pekerjaan Sendiri 2017 (Akta 789) untuk memberi perlindungan kepada individu yang menjalankan pekerjaan sendiri termasuklah pekerja ekonomi gig.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : TUAN MOHD NAZRI BIN ABU
HASSAN [MERBOK]**

TARIKH : 15 FEBRUARI 2023 (RABU)

SOALAN

TUAN MOHD NAZRI BIN ABU HASSAN [MERBOK] minta **MENTERI KESIHATAN** menyatakan komitmen Kementerian untuk menambah baik infrastruktur hospital, kesemua klinik kesihatan dan klinik desa dalam Parlimen Merbok yang semakin hari menerima jumlah pesakit yang tinggi.

JAWAPAN

Tuan Yang di-Pertua,

1. Kementerian Kesihatan sentiasa komited untuk menambah baik prasarana perkhidmatan kesihatan di Parlimen Merbok yang kini mempunyai jumlah penduduk seramai 216,000 orang. Pada masa ini, Parlimen Merbok mempunyai empat (4) Klinik Kesihatan, tujuh (7) Klinik Desa dan dua (2) Klinik Komuniti.

2. Kementerian Kesihatan mempunyai perancangan untuk membina klinik kesihatan baharu bagi menggantikan KK Merbok sedia ada yang telah berusia. Usaha sedang dibuat bagi mengenal pasti tapak yang sesuai. Bagi memenuhi perkhidmatan semasa di kawasan Parlimen Merbok, KKM akan membaik pulih bangunan, infrastruktur dan sistem kejuruteraan di Klinik Kesihatan Merbok dan Klinik Kesihatan Bukit Selambau setelah permohonan peruntukan dalam Bajet 2023 diluluskan oleh Kerajaan. KKM juga sedang membina Klinik Pergigian Bukit Selambau yang dijangka dapat disiapkan pada akhir tahun 2023.

3. Selain itu, penduduk di Parlimen Merbok juga boleh mendapatkan perkhidmatan perubatan daripada Hospital Sultan Abdul Halim (HSAH) yang merupakan hospital pakar major dengan lebih daripada 20 bidang kepakaran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

DARIPADA : YB TUAN CHA KEE CHIN [RASAH]

TARIKH : 15 FEBRUARI 2023 (RABU)

SOALAN

Tuan Cha Kee Chin [Rasah] minta **MENTERI DALAM NEGERI** menyatakan apakah pendirian terkini Kerajaan dalam melayani permohonan kewarganegaraan kepada kanak-kanak yang dilahirkan di Malaysia, dengan ayah kandungnya warga Malaysia tetapi ibunya warga asing, dan pasangan ini telah mendaftarkan perkahwinan selepas anak ini dilahirkan. Apakah hasil ujian DNA yang mengesahkan hubungan bapa-anak akan diiktiraf dalam pemberian taraf kewarganegaraan.

JAWAPAN

Tuan Yang Di Pertua,

Untuk makluman Ahli Yang Berhormat, kewarganegaraan seseorang individu adalah ditentukan berdasarkan kepada status perkahwinan ibu bapa yang sah berdaftar mengikut undang-undang negara dan taraf kewarganegaraan ibu bapa individu berkenaan sewaktu kelahiran berlaku selaras dengan peruntukan Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Sehubungan itu, semua perkahwinan di negara ini hendaklah didaftarkan di bawah perundangan negara yang berkuat kuasa, sebagai contoh jika perkahwinan pasangan bukan Islam, ia didaftarkan di bawah Akta

Membaharui Undang-undang (Perkahwinan dan Perceraian) 1976 [Akta 164].

Oleh yang demikian, bagi kelahiran yang berlaku sebelum pendaftaran perkahwinan ibu bapa mengikut perundangan negara, taraf kewarganegaraan kanak-kanak tersebut adalah mengikut taraf kewarganegaraan ibunya selaras dengan peruntukan undang-undang di bawah Seksyen 17, Bahagian III, Jadual Kedua, Perlembagaan Persekutuan.

Walau bagaimanapun, ibu bapa yang berkenaan boleh memohon kewarganegaraan Malaysia di bawah Perkara 15A Perlembagaan Persekutuan selagi anak mereka berumur di bawah 21 tahun sekiranya telah memenuhi syarat-syarat yang ditetapkan di Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen. Diingatkan bahawa syarat-syarat ini hanya melayakkan permohonan dikemukakan tetapi tidak menjamin bahawa permohonan akan diluluskan.

Untuk makluman Ahli Yang Berhormat, keputusan *Deoxyribonucleic Acid* (DNA) ini hanyalah sebagai dokumen sokongan bagi mengesahkan pertalian darah seseorang dengan ahli keluarga yang lain khususnya di antara kanak-kanak dengan ibu atau bapa ataupun dengan adik beradik yang lain dan tidak dijadikan sebagai bukti konklusif dalam pemberian kewarganegaraan Malaysia. Ini adalah kerana setiap pemohon masih perlu mematuhi undang-undang lain khususnya yang berkaitan dengan pendaftaran perkahwinan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, 2023**

PERTANYAAN : JAWAB LISAN

**DARIPADA : YB TUAN MOHD MISBAHUL MUNIR MASDUKI
[PARIT BUNTAR]**

TARIKH : 15 FEBRUARI 2023 (RABU)

SOALAN

Tuan Haji Mohd Misbahul Munir bin Masduki [Parit Buntar] minta **MENTERI DALAM NEGERI** menyatakan jumlah pelancong dari negara China yang tidak pulang ke negara asal walaupun tempoh visa sudah tamat dan apakah tindakan Kerajaan bagi mengesan pelancong ini.

JAWAPAN

Tuan Yang Di Pertua,

Merujuk kepada data pergerakan warga asing di Malaysia, sehingga 31 Disember 2022 terdapat 92,878 warga China yang berada di Malaysia. Daripada jumlah tersebut:

- i) Seramai **49,253** adalah pemegang pas sah yang dikeluarkan oleh Jabatan Imigresen Malaysia seperti Pas Lawatan Ikhtisas, Pas Lawatan Sosial (Isteri/Suami kepada Warganegara), Pas Residen dan Pas Penggajian.
- ii) Terdapat **442** tahanan warganegara China di Depot Tahanan Imigresen dan sedang menjalani proses dokumentasi penghantaran pulang tahanan dan selebihnya, tempoh visa dan pas lawatan sosial masih bersah laku.
- iii) Selain itu, sebahagian warga China yang masih berada didalam negara kerana tempoh visa mereka masih bersah laku dan melanjutkan tempoh pas mereka.
- iv) Setelah semakan dibuat dan mengambil kira jumlah warganegara China yang masih mempunyai pas sah untuk tinggal di negara ini seperti di para (i), sebanyak 16,578 (5.6%) sahaja daripada jumlah 294,311 yang tiba pada tahun 2022 masih berada di Malaysia. Pihak JIM akan sentiasa membuat semakan dari masa ke semasa sama ada jumlah baki tersebut masih dalam proses permohonan pas - pas yang boleh dimohon seperti Pas Lawatan Ikhtisas, Pas Lawatan Sosial (Isteri/Suami kepada Warganegara), Pas Pelajar dan sebagainya.

SOALAN NO: 35

Penguatkuasaan berterusan juga akan dilaksanakan bagi mengenal pasti lokasi-lokasi yang menjadi tumpuan PATI warganegara China di seluruh Malaysia.

Sepanjang tahun 2022, sebanyak 8,033 operasi dan 11,5134 pemeriksaan telah dijalankan ke atas PATI dan Majikan diseluruh negara. Operasi yang dijalankan tersebut telah membawa kepada penangkapan seramai 22,804 orang PATI dan 371 Majikan.

Manakala bagi tahun 2023, sehingga 13 Februari sebanyak 1,050 operasi dan 12,695 pemeriksaan telah dijalankan ke atas PATI dan Majikan di seluruh negara. Operasi yang dijalankan tersebut telah membawa kepada penangkapan seramai 3,352 orang PATI dan 40 Majikan.

Migrasi tidak teratur merupakan isu global di mana kestabilan ekonomi sesebuah negara menjadi faktor penarik utama terhadap kedatangan PATI. Justeru, Kementerian Dalam Negeri melalui Jabatan Imigresen sentiasa komited dalam menangani isu migrasi tidak teratur menerusi penguatkuasaan secara berterusan dan pemantapan dasar keselamatan bagi menjaga keselamatan dan kedaulatan Negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : JAWAB LISAN

DARIPADA : TUAN RIDUAN BIN RUBIN [TENOM]

TARIKH : 15 FEBRUARI 2023 (RABU)

SOALAN

TUAN RIDUAN BIN RUBIN [TENOM] minta **MENTERI SUMBER
MANUSIA** menyatakan :

- a) penambahbaikan Program Pendidikan serta Latihan Teknikal dan Vokasional (TVET) yang sedang dilakukan oleh Kementerian; dan
- b) adakah terdapat pasukan khas untuk turun padang ke kawasan luar bandar di Sabah untuk mempromosi dan menarik minat belia untuk menyertai program TVET.

JAWAPAN

Tuan Yang di-Pertua,

Mesyuarat Jemaah Menteri pada 7 Disember 2022 telah membuat keputusan agar Kementerian Sumber Manusia menggalas tugas sebagai memindahkan fungsi Sekretariat Majlis TVET Negara (MTVET) yang baharu. Selaras dengan itu, KSM bersedia menggalas peranan tersebut melalui gerak kerja komprehensif dengan sokongan dan kerjasama kukuh semua pemegang taruh TVET di pihak Kerajaan dan juga swasta secara berterusan.

Secara prinsipnya, agenda menambah baik pelaksanaan TVET di Malaysia akan berpaksikan kepada tiga teras strategi yang digariskan oleh MTVET iaitu melalui tadbir urus bersepadu dan terselaras, TVET dipacu industri dan TVET mencorak masa hadapan. Tiga teras strategi ini akan dijadikan rujukan utama dalam merangka agenda memperkasa pelaksanaan TVET meliputi aspek tadbir urus, kualiti, industri, pembiayaan dan penjenamaan.

Kementerian bersama semua pemegang taruh TVET akan memanfaatkan pelbagai hasil kajian terdahulu yang telah mengenalpasti isu dan cadangan-cadangan penambahbaikan berkaitan TVET sebelum ini. Setiap hasil dapatan kajian ini akan dinilai dan inisiatif yang dicadangkan akan diteliti secara terperinci bagi memastikan kebolehlaksanaan dan impaknya terhadap TVET negara secara menyeluruh.

Usaha mempromosi TVET di seluruh negara termasuk di Sabah dilakukan secara berterusan oleh semua Kementerian dan agensi berkaitan TVET dalam usaha menarik minat segenap lapisan masyarakat meliputi komuniti dalam bandar dan luar bandar bagi menyertainya. Pelbagai pendekatan promosi dilakukan seperti program *outreach*, karnival, dan hebahan-hebahan di media elektronik atau platform media sosial bagi meluaskan cakupan penyampaian maklumat berkaitan TVET ini.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : TUAN AFNAN HAMIMI BIN TAIB AZAMUDDEN
[ALOR SETAR]**

TARIKH : 15 FEBRUARI 2023 (RABU)

SOALAN

TUAN AFNAN HAMIMI BIN TAIB AZAMUDDEN [ALOR SETAR] minta **MENTERI PENGANGKUTAN** menyatakan apakah status terkini berkaitan kelulusan projek pembinaan Lapangan Terbang Kulim dan Kedah Aerotropolis di Sidam, Kedah.

JAWAPAN

Tuan Yang Dipertua,

1. Untuk makluman Ahli Yang Berhormat, Mesyuarat Majlis Perancang Fizikal Negara (MPFN) dalam mesyuaratnya pada 27 Oktober 2020 memberi kelulusan prinsip terhadap cadangan Projek Pembangunan Lapangan Terbang Antarabangsa Kulim (KXP). Kelulusan prinsip tersebut adalah tertakluk kepada permohonan mendapatkan pertimbangan daripada Kementerian Pengangkutan (MOT) dan agensi-agensi Kerajaan yang lain termasuk Kementerian Kewangan (MOF), Kementerian Dalam Negeri (KDN), Jabatan Alam Sekitar (JAS), Tentera Udara Diraja Malaysia (TUDM) dan Pihak Berkuasa Penerbangan Awam Malaysia (CAAM).
2. Kementerian Pengangkutan ingin menjelaskan bahawa sehingga kini, tiada kelulusan diberikan untuk menubuhkan aerodrom bagi Projek KXP seperti mana yang diperuntukkan di bawah Peraturan-Peraturan Penerbangan Awam (Pengendalian Aerodrom) 2016.

3. Selain itu, cadangan pembinaan KXP juga adalah tertakluk kepada hasil Kajian Pelan Strategik Lapangan Terbang Kebangsaan (*National Airport Strategic Plan* – NASP) yang telah bermula pada Mac 2022 dan akan mengambil masa selama 18 bulan untuk disiapkan. Kajian ini melibatkan kesemua 42 lapangan terbang sedia ada dan akan turut meneliti cadangan pembinaan lapangan terbang baharu.
4. Oleh itu, kelulusan akhir bagi cadangan pembinaan KXP hanya akan dipertimbangkan apabila kajian NASP telah disiapkan serta pematuhan kepada semua syarat yang bakal ditetapkan oleh agensi-agensi kerajaan yang lain seperti mana yang dinyatakan dalam laporan-laporan teknikal seperti Laporan Penilaian Impak Alam Sekeliling (EIA), Laporan Penilaian Impak Sosial (SIA), Laporan Penilaian Impak Trafik (TIA) dan sebagainya. Untuk makluman, sehingga kini pihak pemaju belum dapat mengemukakan laporan-laporan TIA, SIA dan EIA kepada kerajaan. Pelaksanaan kajian-kajian tersebut dan kelulusan oleh pihak-pihak berkuasa yang berkenaan adalah wajib berdasarkan kehendak di bawah undang-undang Malaysia.
5. Kementerian Pengangkutan sentiasa terbuka kepada sebarang cadangan dari pihak pemaju swasta mahupun kerajaan negeri khususnya berkenaan pembangunan infrastruktur awam yang lebih berdaya saing dari segi ekonomi dan jauh lebih selesa untuk rakyat. Walau bagaimanapun, cadangan pembinaan mana-mana lapangan terbang baharu di Malaysia perlu benar-benar *viable*, *sustainable* dan memenuhi keperluan teknikal dan komersial semasa yang ditetapkan masing-masing oleh CAAM dan MAVCOM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : JAWAB LISAN

DARIPADA : TUAN LEE CHUAN HOW [IPOH TIMUR]

TARIKH : 15 FEBRUARI 2023 (RABU)

SOALAN

TUAN LEE CHUAN HOW [IPOH TIMUR] minta **MENTERI SUMBER MANUSIA** menyatakan peratus keseluruhan jumlah gaji dan faedah pengerusi, ahli lembaga PERKESO dan kakitangan PERKESO, daripada jumlah kutipan caruman digunakan untuk imbuhan dan faedah lain (diterjemahkan kepada nilai kewangan).

JAWAPAN

Tan Sri Yang di-Pertua,

Secara umumnya, peratus keseluruhan jumlah kos emolumen dan faedah kakitangan PERKESO termasuk ahli Lembaga PERKESO adalah dianggarkan dalam lingkungan 9% daripada jumlah keseluruhan kutipan caruman PERKESO. Berdasarkan statistik kewangan PERKESO bagi tempoh tiga (3) tahun bermula tahun 2020, 2021 dan 2022 (belum diaudit), jumlah kutipan caruman PERKESO adalah masing-masing sebanyak RM5.012 bilion, RM5.20 bilion dan RM5.84 bilion (2022 - belum diaudit) manakala jumlah kos emolumen dan faedah kakitangan termasuk ahli Lembaga PERKESO pula adalah masing-masing berjumlah RM448.32 juta, RM477.66 juta dan RM516.85 juta (2022 - belum diaudit).

Secara ringkasnya, nisbah kos emolumen dan faedah kakitangan termasuk ahli Lembaga PERKESO berbanding jumlah kutipan caruman PERKESO adalah pada kadar 0.09 : 1.00 yang mana bagi setiap RM1.00 kutipan caruman, hanya RM0.09 dibelanjakan bagi bayaran emolumen dan faedah kakitangan termasuk ahli Lembaga PERKESO. Baki selebihnya daripada kutipan caruman PERKESO telah dimanfaatkan antaranya bagi tujuan pembayaran faedah PERKESO dan perbelanjaan operasi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

**DARIPADA : YB TUAN KESAVAN A/L SUBRAMANIAM
[SUNGAI SIPUT]**

TARIKH : 15 FEBRUARI 2023 (RABU)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI DALAM NEGERI** menyatakan berapa ramaikah pekerja dari negara India yang bekerja di Malaysia. Apakah 8 bidang kerja utama yang mereka ceburi. Nyatakan jumlah pekerja dalam 8 bidang ini.

JAWAPAN

Tuan Yang Di Pertua,

Untuk makluman Ahli Yang Berhormat, sehingga 22 Januari 2023, Jabatan Imigresen Malaysia merekodkan seramai 81,002 orang pekerja asing aktif dari negara India.

Pecahan sektor ekonomi bagi pekerja asing warganegara India adalah seperti berikut:

- (i) Sektor perkilangan iaitu 2,806 orang;
- (ii) Sektor pembinaan iaitu 6,015 orang;
- (iii) Sektor perladangan iaitu 26,309 orang;
- (iv) Sektor perkhidmatan iaitu 34,064 orang;
- (v) Sektor pertanian iaitu 10,668 orang;
- (vi) Sektor perlombongan dan pengkuarian iaitu 2 orang; dan
- (vii) Sektor pembantu rumah asing iaitu 1,138 orang.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

DARIPADA : YB TUAN AHMAD JOHNIE BIN ZAWAWI [IGAN]

TARIKH : 15 FEBRUARI 2023 (RABU)

SOALAN

TUAN HAJI AHMAD JOHNIE BIN ZAWAWI [IGAN] minta **MENTERI DALAM NEGERI** menyatakan berapa jumlah pegawai polis dari Semenanjung Malaysia telah dipindahkan ke Sarawak atas faktor masalah disiplin sejak tahun 2018. Apakah justifikasi mereka ditukar kerja ke Sarawak.

JAWAPAN

Tuan Yang Di Pertua,

Jumlah pegawai polis yang telah ditukarkan daripada Semenanjung ke Sarawak atas masalah disiplin sejak tahun 2018 adalah seperti yang berikut:

STATISTIK PERTUKARAN PEGAWAI POLIS YANG MEMPUNYAI MASALAH DISIPLIN MULAI TAHUN 2018 HINGGA JANUARI 2023				
PEGAWAI POLIS TERLIBAT	PERTUKARAN KE			JUMLAH KESELURUHAN
	SABAH	SARAWAK	SEMENANJUNG	
	25	20	294	339
PERATUSAN	7.4%	5.9%	86.7%	

Berdasarkan kepada statistik pertukaran seperti di atas, pelaksanaan pertukaran yang telah dibuat melibatkan pegawai polis bermasalah dan mempunyai masalah disiplin adalah seperti berikut:

1. Pertukaran ke Semenanjung sebanyak 294 (86.7%);
2. Pertukaran ke Sabah sebanyak 25 (7.4%); dan
3. Pertukaran ke Sarawak sebanyak 20 (5.9%).

Statistik di atas juga menunjukkan bahawa pertukaran ke Semenanjung mencatatkan peratusan yang tertinggi iaitu 86.7%, manakala pertukaran ke Sarawak hanya mencatatkan peratusan yang kecil iaitu sebanyak 5.9% sahaja.

Pertukaran tersebut dilakukan kerana didapati pegawai polis yang terlibat didapati mempunyai masalah disiplin dan integriti serta melakukan kesalahan jenayah. Pertimbangan dalam membuat keputusan tersebut

telah mengambil kira dasar dan peraturan-peraturan pertukaran sedia sepertimana **Pekeliling Perkhidmatan Bil. 3 Tahun 2004 (Panduan Pertukaran Pegawai Awam)** di para 5 (iv) yang menjelaskan seperti berikut:

1. Tidak menggunakan pertukaran sebagai hukuman kecuali pertukaran tersebut dapat membantu melicinkan proses tindakan tatatertib yang diambil terhadap pegawai berkenaan.

Antara isu dan kesalahan yang dilakukan oleh pegawai berkenaan adalah seperti yang berikut:

- a. Mempunyai hubungan intim dengan pegawai polis yang telah berkahwin sehingga mengganggu keharmonian rumah tangga;
- b. Ditangkap atas kesalahan berkhawat dengan pegawai polis yang telah berkahwin; dan
- c. Terlibat dalam kegiatan dan aktiviti tidak bermoral.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATO' DR. AHMAD YUNUS BIN HAIRI
[KUALA LANGAT]**

TARIKH : 15 FEBRUARI 2023 (RABU)

SOALAN

DATO' DR. AHMAD YUNUS BIN HAIRI [KUALA LANGAT] minta **MENTERI KESIHATAN** menyatakan : -

- (a) berapa jumlah fasiliti kesihatan swasta yang dimiliki secara 51% hingga 100% oleh ekuiti asing berdasarkan dasar penyertaan ekuiti asing dalam penjagaan kemudahan kesihatan swasta; dan
- (b) apakah penambahbaikan dasar ini selepas libat urus dengan persatuan-persatuan serta apakah jaminan keselamatan data pesakit kepada fasiliti yang dimiliki 100% ekuiti asing.

JAWAPAN

Tuan Yang di-Pertua,

1. Kementerian Kesihatan Malaysia (KKM) bertanggungjawab kepada perkhidmatan dan pengoperasian fasiliti kesihatan awam, serta mengawal selia kemudahan dan perkhidmatan jagaan kesihatan swasta berdasarkan **Akta Kemudahan dan Perkhidmatan Jagaan Kesihatan Swasta 1998**.
2. Semakan KKM melalui Suruhanjaya Syarikat Malaysia mendapati jumlah fasiliti jagaan kesihatan swasta dengan pegangan ekuiti asing antara 51% hingga 100% sehingga tahun 2022 adalah sebanyak 108 buah fasiliti.
3. Bagi dasar penyertaan ekuiti asing, perkara tersebut masih di peringkat kajian dan belum dimuktamadkan. Namun demikian, KKM

sentiasa komited untuk menambah baik dasar dan peraturan berhubung penjagaan kesihatan dari semasa ke semasa.

4. Berhubung isu keselamatan data pesakit, perkara tersebut adalah tertakluk kepada peraturan dan undang-undang sedia ada termasuk **Akta Kemudahan dan Perkhidmatan Jagaan Kesihatan Swasta 1998, Akta Perlindungan Data Peribadi 2010** serta **Guidelines on Confidentiality 2011** bagi pengamal perubatan yang berdaftar di bawah Majlis Perubatan Malaysia (MMC).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

DARIPADA : TUAN CHOW YU HUI [RAUB]

TARIKH : 15 FEBRUARI 2023 (RABU)

SOALAN

TUAN CHOW YU HUI [RAUB] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan berapa kali gangguan air yang telah berlaku di daerah Raub, Pahang mengikut loji rawatan air berdasarkan pecahan tahun 2018 hingga 2022.

JAWAPAN

Tuan Yang di-Pertua,

1. Kementerian memandang serius isu gangguan bekalan air yang telah berlaku di daerah Raub terutamanya gangguan bekalan tidak berjadual. Selain daripada insiden paip pecah, antara punca lain berlakunya gangguan bekalan air tidak berjadual di daerah Raub adalah disebabkan pencemaran sumber air mentah.

2. Berdasarkan rekod, kekerapan gangguan di antara tempoh 1 jam ke 24 jam mengikut bilangan Loji Rawatan Air (LRA) dari tahun 2018 hingga 2022 adalah seperti berikut:

- i. 2018 = 172 kali (6 LRA)
- ii. 2019 = 118 kali (5 LRA)
- iii. 2020 = 150 kali (6 LRA)
- iv. 2021 = 123 kali (8 LRA)
- v. 2022 = 116 kali (7 LRA)

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATUK HAJI IDRIS BIN AHMAD
[BAGAN SERAI]**

TARIKH : 15 FEBRUARI 2023 (RABU)

SOALAN

DATUK HAJI IDRIS BIN AHMAD [BAGAN SERAI] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status projek tebatan banjir di bawah JPS yang telah mengemukakan permohonan di bawah Rancangan Malaysia Ke-12 (RMK12) terutama di kawasan Bagan Serai yang melibatkan kos RM23 juta.

JAWAPAN

Tuan Yang di-Pertua,

1. Kementerian sentiasa mengambil langkah proaktif dalam melaksana langkah-langkah mitigasi banjir bagi mengurangkan risiko banjir yang dihadapi oleh penduduk di kawasan Bagan Serai.
2. Untuk makluman Ahli Yang Berhormat, Jabatan Pengairan dan Saliran (JPS) akan memohon peruntukan di bawah *Rolling Plan* Keempat (RP4) untuk melaksanakan Projek Pemuliharaan Sungai Kurau serta kerja berkaitan di Daerah Kerian, Perak Darul Ridzuan yang bernilai RM23 juta. Tempoh pelaksanaan projek ini adalah selama 4 tahun bermula pada tahun 2024 dan siap pada tahun 2027.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DR. MOHAMMED TAUFIQ BIN JOHARI
(SUNGAI PETANI)**

TARIKH : 15 FEBRUARI 2023 (RABU)

SOALAN

DR. MOHAMMED TAUFIQ BIN JOHARI (SUNGAI PETANI) minta **MENTERI BELIA DAN SUKAN** menyatakan adakah Kementerian berhasrat untuk memastikan pembangunan belia dan sukan negara seimbang dan apakah program-program yang bakal dilaksanakan untuk pembangunan belia.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Belia dan Sukan (KBS) sentiasa memastikan program-program pembangunan belia dan sukan yang dilaksanakan adalah seimbang. Kedua-dua elemen tersebut merupakan *core business* Kementerian dan program-program berkenaan diterjemahkan berpandukan dua dasar utama iaitu Dasar Belia Malaysia (DBM) dan Visi Sukan Negara (VSN) 2030.
2. Pada tahun 2022 pihak Kementerian telah melaksanakan pelbagai program pembangunan belia dan sukan untuk dimanfaatkan oleh golongan belia di segenap peringkat. Sebanyak 134 program merangkumi 4,488 aktiviti belia dan sukan melibatkan penyertaan seramai 200 orang belia setiap program. KBS menyasarkan penyertaan seramai 897,600 orang belia di seluruh negara melalui bidang fokus utama seperti program pembudayaan sukan, pembangunan bakat, program peluang pekerjaan, kepimpinan belia, kesukarelawanan dan gaya hidup sihat.
3. Pada tahun 2023 ini, 200 kursus atau latihan kemahiran jangka pendek untuk belia dirancang untuk dilaksanakan. Antara program utama yang akan dianjurkan ialah Program ***Skills For Life***. Program baru ini adalah bertujuan untuk menyediakan peluang latihan kemahiran asas kepada belia dengan menggunakan peralatan, kemudahan sedia ada, serta kepakaran tenaga pengajar ILKBS.
4. Kemahiran yang diperolehi boleh digunakan dalam kehidupan seharian yang mana ia secara tidak langsung membantu menangani kos sara hidup yang tinggi yang dihadapi oleh belia pada masa kini. Sebanyak 22 program akan dilaksanakan oleh ILKBS dengan mensasarkan penyertaan seramai 300 orang peserta bagi setiap program dan keseluruhan peserta ialah seramai 6,600 peserta. Program dijalankan dalam tempoh tiga (3) hingga lima (5) jam pada hujung minggu (Jumaat, Sabtu atau Ahad) dan dilaksanakan di luar ILKBS dengan menggunakan

NO. SOALAN : 44

fasiliti di bawah KBS atau lain-lain fasiliti sedia ada melibatkan kursus memasak, make up, penyediaan kuih tradisional dan gunting rambut.

5. Selain dari itu, Kementerian juga akan memberi nafas baharu program Rakan Muda dengan menjenamakan semula sembilan (9) gaya hidup agar selari dengan minat dan *trend* belia masa kini. Sebanyak 273 aktiviti telah dirancang untuk dilaksanakan di peringkat kebangsaan, negeri dan daerah dengan sasaran penyertaan seramai 30,000 orang belia berumur 15 hingga 25 tahun di seluruh negara.

6. Pada tahun ini juga antara fokus utama Kementerian adalah untuk mengkaji kaedah-kaedah untuk membantu para belia muflis keluar dari kategori tersebut. Berdasarkan statistik oleh Jabatan Insolvensi Malaysia pada tahun 2022, seramai 759 orang belia yang berumur kurang 25 tahun hingga 34 tahun telah diisytiharkan muflis. Kementerian akan berkolaborasi dengan Kementerian/agensi terbabit untuk menyemak semula dasar sedia ada bagi membantu golongan ini keluar dari status muflis.

7. Kementerian juga akan terus melaksana dan memperkukuhkan pendidikan dan latihan teknikal dan vokasional (TVET) kepada belia di negara ini melalui 22 buah Institusi Latihan Kemahiran Belia dan Sukan (ILKBS) di seluruh negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : TUAN KHOO POAY TIONG
[KOTA MELAKA]**

TARIKH JAWAB : 15 FEBRUARI 2023 (RABU)

SOALAN

**YB TUAN KHOO POAY TIONG [KOTA MELAKA] minta MENTERI
PEMBANGUNAN KERAJAAN TEMPATAN menyatakan :**

- (a) jumlah projek perumahan dan komersial swasta yang telah dikategorikan sebagai 'projek sakit' bagi setiap negeri; dan
- (b) apakah langkah-langkah yang akan diambil oleh Kementerian untuk mengatasi masalah ini, termasuklah langkah-langkah pencegahan untuk projek-projek sebegini pada masa hadapan.

JAWAPAN

Tuan Yang di-Pertua,

(a) Untuk makluman Ahli Yang Berhormat, sesuatu projek perumahan swasta berlesen akan dikategorikan sebagai projek sakit apabila:

- i) projek telah tamat tempoh Perjanjian Jual Beli;
- ii) projek mengalami kelewatan dengan jurang perbezaan melebihi 30% berbanding jadual kerja yang ditetapkan dalam Perjanjian Jual Beli.

Sehingga 31 Januari 2023, sebanyak 429 projek perumahan telah dikategorikan sebagai projek sakit. Ini melibatkan sebanyak 70,727 bilangan unit rumah dengan jumlah pembeli sebanyak 29,147 orang.

(b) Pelbagai langkah kawalan dilaksanakan oleh Kementerian Pembangunan Kerajaan Tempatan (KPKT) bagi mengatasi masalah projek sakit ini. Antara tindakan yang telah diambil adalah seperti berikut:

- i) mengenal pasti dan memaparkan kepada umum senarai projek perumahan yang sakit iaitu projek telah tamat tempoh Perjanjian Jual Beli yang pertama di laman portal Jabatan Perumahan Negara (JPN). Senarai projek ini boleh dijadikan panduan oleh bakal pembeli rumah dan pihak pembiaya sebelum meluluskan sesuatu pinjaman perumahan baharu dan mengawal bayaran kemajuan kepada pemaju sedia ada;
- ii) melaksanakan pemantauan yang lebih kerap termasuk pembekuan akaun kemajuan perumahan (*Housing Development Account* - HDA) bagi projek-projek sakit terpilih untuk

mengelakkan pengeluaran wang secara tidak bertanggungjawab oleh pemaju;

- iii) menyenarai hitam pemaju dan Ahli Lembaga Pengarah dan menyekat pemaju projek sakit daripada memohon Permit Iklan dan Jualan (*Advertising Permit*) yang baharu selagi projek sakit sedia ada belum disiapkan dengan Sijil Penyiapan dan Pematuhan (*Certificate of Completion and Compliance, CCC*) Penuh; dan
- iv) mengesahkan projek sakit yang tiada kemajuan kerja di tapak dalam tempoh yang lama sebagai projek terbengkalai selaras dengan Seksyen 11(1)(ca), Akta Pemajuan Perumahan (Kawalan Dan Pelesenan) 1966 (Akta118) & Peraturan-Peraturan.

Bagi pembeli yang terjejas pula, Kementerian ini melalui JPN akan mengeluarkan surat pengesahan projek bermasalah (sakit atau terbengkalai) atas permohonan pembeli kepada pihak pembiaya pinjaman untuk penstrukturan semula pinjaman. Ini adalah bagi membantu meringankan beban kewangan yang ditanggung oleh pembeli.

Selain itu, KPKT telah menubuhkan *Task Force* Projek Perumahan Swasta Sakit dan Terbengkalai untuk mencari pendekatan yang lebih berfokus dan strategik serta memberi impak positif dalam menyelesaikan isu projek sakit dan terbengkalai.

Dalam memastikan langkah pencegahan terhadap isu ini, Kementerian sentiasa berusaha untuk mengenal pasti dan menyelesaikan isu projek perumahan sakit dan terbengkalai ini secara holistik dengan melibatkan lebih banyak pihak di dalam industri untuk mendapatkan pandangan dan idea dari perspektif yang lebih meluas melalui program-program yang dirancang seperti berikut:

SOALAN NO : 45

- i) mengadakan program kerjasama pintar (*smart partnership*) bersama Kerajaan Negeri, Lembaga Perumahan dan Hartanah Negeri, Pihak Berkuasa Tempatan, agensi kerajaan, agensi teknikal, dan pemaju;
- ii) mengadakan Forum Perumahan Swasta dengan kumpulan kerja yang terdiri daripada pemegang taruh (*stakeholder*) dan pemain industri, antaranya *Real Estate and Housing Developers' Association Malaysia* (REHDA), Persatuan Bank Malaysia, Persatuan Pembeli Rumah, Jabatan Peguam Negara, pelikuidasi dan lain-lain agensi kerajaan dan teknikal;
- iii) memperkasakan syarikat berkaitan Kementerian iaitu Perbadanan PR1MA Malaysia dan Syarikat Perumahan Negara Berhad (SPNB) supaya dapat memainkan peranan lebih proaktif dalam menyelesaikan isu projek sakit secara telus dan efektif;
- iv) mengadakan taklimat berjadual kepada pemaju di seluruh Semenanjung Malaysia berkaitan tanggungjawab dan kewajipan pemaju perumahan berlesen berdasarkan Akta 118; dan
- v) menggalakkan penggunaan teknologi baharu dalam pembinaan seperti *Industrialised Building System* (IBS) dan bahan binaan alternatif untuk mempercepatkan penyiapan projek perumahan dengan kos yang lebih murah tanpa menjejaskan kualiti pembinaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

DARIPADA : TUAN ONN BIN ABU BAKAR [BATU PAHAT]

TARIKH : 15 FEBRUARI 2023 (RABU)

SOALAN

TUAN ONN BIN ABU BAKAR [BATU PAHAT] minta **MENTERI KESIHATAN** menyatakan bilangan pesakit secara umumnya yang memerlukan katil hospital kian bertambah. Tetapi pembinaan hospital atau penambahan katil di hospital lebih perlahan dari pertambahan bilangan pesakit. Status negara yang akan berada dalam kumpulan “aging country” akan lebih menghambat keperluan tambahan hospital atau setidak-tidaknya tambahan katil hospital. Apakah dasar Kementerian telah mengambil kira suasana ini.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa komited dalam menambah baik kemudahan kesihatan di seluruh negara menerusi pembinaan fasiliti kesihatan baharu dan menaik taraf fasiliti sedia ada berdasarkan faktor-faktor berikut:

- (i) kadar penggunaan katil (*bed occupancy rate* - BOR) yang tinggi;
- (ii) keadaan infrastruktur bangunan yang lama;
- (iii) kepadatan penduduk;
- (iv) keperluan perkhidmatan kepakaran;
- (v) akses kepada perkhidmatan di fasiliti sedia ada; dan
- (vi) ketersediaan tapak yang sesuai dan sumber manusia serta peruntukan Kerajaan.

2. Pada tahun 2021, Malaysia telah mencapai nisbah bilangan katil iaitu 2.07 bagi setiap 1,000 penduduk, di mana bilangan katil telah meningkat kepada sebanyak 67,460 katil pada tahun 2021 berbanding 55,952 katil pada tahun 2016 iaitu peningkatan sebanyak 11,508 katil. KKM menyasarkan nisbah katil hospital kepada 1,000 penduduk pada kadar 2.08 pada tahun 2025. Nisbah bilangan katil pada tahun 2021 iaitu 2.07 bagi setiap 1,000 penduduk telah mencapai sasaran yang telah ditetapkan.

3. Walau bagaimanapun, KKM merancang untuk menambah bilangan katil melalui pembinaan hospital baru dan bangunan tambahan seperti berikut:

- (i) Hospital Pasir Gudang (304 katil);
- (ii) Bangunan Tambahan Hospital Segamat (63 katil);
- (iii) Bangunan Tambahan Hospital Kuala Pilah (140 katil);
- (iv) Bangunan Tambahan Hospital Miri (328 katil);

- (v) Bangunan Tambahan Hospital Baling (74 katil);
- (vi) Hospital Lawas (76 katil); dan
- (vii) Hospital Petrajaya (300 katil).

4. Antara projek hospital yang telah siap pada tahun 2022 dan awal 2023 adalah seperti berikut:

- (i) Hospital Pendang, Kedah (126 katil);
- (ii) Pusat Kardiologi Hospital Serdang (262 katil);
- (iii) Blok Tambahan Hospital Putrajaya (220 katil);
- (iv) Hospital Tanjong Karang, Selangor (150 katil);
- (v) Hospital Bera, Pahang (40 katil); dan
- (vi) Hospital Sri Aman, Sarawak (108 katil).

5. Selain itu, KKM turut menyediakan perkhidmatan *Short Stay Unit* (SSU) yang memfokuskan kepada pesakit stabil yang memerlukan rawatan kurang daripada 72 jam. Pesakit-pesakit yang dikenal pasti akan dimasukkan ke SSU untuk rawatan yang berfokus dan optimum. Ini dapat mengurangkan waktu menunggu untuk mendapatkan katil bagi pesakit kes-kes ringan yang memerlukan pemantauan jangka pendek di hospital, seterusnya melegakan kesesakan di Jabatan Kecemasan dan mengurangkan tempoh keberadaan pesakit di hospital.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

DARIPADA : TUAN CHOW KON YEOW [BATU KAWAN]

TARIKH : 15 FEBRUARI 2023 (RABU)

SOALAN

TUAN CHOW KON YEOW [BATU KAWAN] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan inisiatif Kementerian dalam mengatasi peningkatan bilangan kenderaan tidak mesra alam (pengangkutan berasaskan bahan api fosil seperti petrol dan gas) yang mencetuskan pelbagai isu alam sekitar antaranya pemanasan global, pencemaran Gas Rumah Hijau (GHG) dan lain-lain. Apakah yang dilakukan/perancangan Kementerian dalam menghadapi krisis iklim bagi tempoh 2018 hingga 2023. Senaraikan juga insentif-insentif yang diberikan/ditawarkan kepada Kerajaan Negeri yang melaksanakan agenda hijau pada tempoh sama.

JAWAPAN

Tuan Yang di-Pertua,

1. Kementerian Sumber Asli, Alam Sekitar dan Perubahan Iklim (NRECC) telah membangunkan Pelan Pembangunan Mobiliti Rendah Karbon 2021-2030 (Low Carbon Mobility Blueprint – LCMB) yang menggariskan fokus dan strategi bagi merealisasikan mobiliti rendah karbon dalam sektor pengangkutan darat menerusi pengurangan pelepasan gas rumah kaca (greenhouse gas - GHG) dan penjimatan tenaga menjelang tahun 2030. Pelaksanaan LCMB adalah selaras dengan sasaran oleh Dasar Pengangkutan Negara dan melengkapi

Dasar Automotif Nasional (NAP) 2020 yang menjurus kepada empat (4) bidang fokus utama iaitu penambahbaikan kecekapan bahan api dan pelepasan GHG oleh kenderaan, penggunaan mobiliti elektrik, penggunaan bahan api alternatif dan peralihan mod pengangkutan.

2. Bagi menyokong usaha kerajaan dalam berdepan dengan krisis iklim yang melanda sekarang dan pada masa akan datang, pelbagai dasar dan inisiatif telah dan akan dilaksanakan. Antara program dan inisiatif yang dilaksanakan adalah:

- i. melaksanakan dasar 'carbon pricing' secara berfasa untuk menyokong usaha negara untuk mengurangkan pelepasan GHG;
- ii. mencapai kapasiti penjanaan tenaga boleh baharu sebanyak 31% pada tahun 2025 dan 40% pada tahun 2035 bagi grid kebangsaan melalui Pelan Peralihan Tenaga Malaysia 2021-2040;
- iii. aspirasi sasaran perolehan 100% kenderaan Kerajaan yang bukan berasaskan enjin pembakaran dalaman pada tahun 2030;
- iv. mengekalkan litupan kawasan berhutan melebihi 50 peratus selaras dengan komitmen negara semasa Sidang Kemuncak Bumi di Rio de Janeiro pada 1992 di mana jumlah keluasan hutan pada tahun 2018 adalah seluas 18,273,487 hektar iaitu bersamaan dengan 55.3 peratus daripada keluasan tanah negara;
- v. Program Penghijauan Malaysia melalui Kempen Penanaman 100 Juta Pokok bermula tahun 2021 hingga 2025 di bawah RMKe-12 dengan peruntukan sebanyak RM25 juta. Sehingga 6 Julai 2022, sebanyak 35.38 juta pokok telah berjaya ditanam di seluruh negara;

- vi. mencapai sasaran sifar sisa yang dihantar ke tempat pelupusan sampah melalui konsep sisa kepada tenaga dan meningkatkan kadar kitar semula kepada 40% pada tahun 2025;
 - vii. transformasi bandar di Malaysia ke arah pembangunan rendah karbon di bawah Pelan Induk Bandar Rendah Karbon; dan
 - viii. meningkatkan ketahanan kepada impak jangka masa panjang perubahan iklim melalui pembangunan Pelan Adaptasi Kebangsaan.
3. Menyedari bahawa peranan kerajaan-kerajaan negeri juga penting dalam menangani perubahan iklim, Kerajaan telah menyediakan insentif-insentif kepada Kerajaan Negeri bagi melaksanakan agenda hijau seperti berikut:
- i. Geran Pemangkin Bandar Rendah Karbon (GeRAK) dengan peruntukan sebanyak RM 35 juta pada tahun 2021 hingga 2022 kepada 141 PBT yang telah memohon bagi melaksanakan 228 projek pengurangan pelepasan karbon; dan
 - ii. menggalakkan penyertaan Kerajaan Negeri di dalam Program *International Greentech & Eco Products Exhibition & Conference Malaysia (IGEM)*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATO' RAMANAN RAMAKRISHNAN
[SUNGAI BULOH]**

TARIKH : 15 FEBRUARI 2023 (RABU)

SOALAN

DATO' RAMANAN RAMAKRISHNAN [SUNGAI BULOH] minta **MENTERI KEMAJUAN DESA DAN WILAYAH** menyatakan bagaimanakah kita dapat pastikan jaringan jalan raya dan penyelenggaraan jalan raya dapat dimantapkan apabila melibatkan pihak selain dari JKR bagi peralihan jalan kampung dalam urbanisasi bagi mengurangkan faktor-faktor kesesakan seperti lampu tidak berfungsi akibat kecurian seperti komponen '*feeder pillar*' dan kabel.

JAWAPAN

Tuan Yang di-Pertua,

Untuk makluman Yang Berhormat, di bawah Kementerian ini terdapat dua (2) program jalan raya iaitu program Jalan Luar Bandar (JALB) dan program Jalan Perhubungan Desa (JPD) yang turut dikenali sebagai Jalan Kampung.

Jalan raya yang dibina di bawah kedua-dua program ini adalah berdasarkan permohonan oleh Kerajaan Negeri. Selepas siap dibina atau dinaiktaraf, jalan raya ini akan diserahkan semula kepada Kerajaan Negeri untuk didaftarkan di bawah MARRIS bagi tujuan penyelenggaraan berterusan. Ini bagi memastikan keadaan jalan yang siap dibina sentiasa selamat dan selesa untuk dilalui oleh pengguna.

Bagi projek-projek Jalan Luar Bandar (JALB), agensi yang bertanggungjawab menyelenggara jalan tersebut adalah JKR Negeri. Manakala bagi Jalan Perhubungan Desa (JPD), penyelenggaraan jalan ini dilaksanakan oleh Pejabat Daerah. Bagaimanapun, pihak JKR Negeri dan Pejabat Daerah tidak memperbaiki dan memulihkan kerosakan lampu, kabel dan *feeder pillar* yang disebabkan kecurian kerana ianya di bawah tanggungjawab syarikat utiliti elektrik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATO' SRI RICHARD RIOT ANAK
JAEM [SERIAN]**

TARIKH : 15 FEBRUARI 2023 (RABU)

SOALAN

DATO' SRI RICHARD RIOT ANAK JAEM [SERIAN] minta **MENTERI KESIHATAN** menyatakan perancangan Kementerian untuk membina hospital baharu di Daerah Serian.

JAWAPAN

Tuan Yang di-Pertua,

1. KKM mempunyai perancangan jangka panjang untuk memperkukuh perkhidmatan kepakaran di Hospital Serian yang merupakan sebuah hospital pakar minor. Sehubungan dengan itu, lima pakar telah ditempatkan di Hospital Serian yang terdiri daripada dua pakar Perubatan Dalaman, dua pakar Obstetrik & Ginekologi dan seorang pakar Psikiatri.
2. Selain itu, KKM juga bercadang untuk membina blok klinikal tambahan di tapak Hospital Serian sedia ada. Namun, cadangan ini akan dimohon dalam Rancangan Malaysia yang akan datang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

DARIPADA : DATO ANYI NGAU [BARAM]

TARIKH : 15 FEBRUARI 2023 (RABU)

SOALAN

DATO ANYI NGAU [BARAM] minta **MENTERI KEMAJUAN DESA DAN WILAYAH** menyatakan status pelaksanaan projek menaik taraf Jalan Balak Fasa 4 untuk kawasan Parlimen Baram yang diluluskan oleh Kerajaan terdahulu. Sila senaraikan lokasi dan jenis jalan yang akan dibina serta jadual pelaksanaan jalan-jalan tersebut.

JAWAPAN

Tuan Yang di-Pertua,

Untuk makluman Yang Berhormat, Projek Naiktaraf Jalan-Jalan Balak di Negeri Sarawak (Fasa 4) di kawasan Parlimen Baram adalah melibatkan naiktaraf tiga (3) kawasan bekas jalan balak iaitu di kawasan Ba Abang sepanjang 3.25km, Ba Mubui sepanjang 6.10km dan Long Tungan sepanjang 8.66km. Skop projek adalah menaiktaraf jalan dengan spesifikasi JKR R1 konkrit sepanjang 18.1km.

Projek ini adalah dalam proses penyediaan dokumen tender dan dijangka akan ditender pada suku kedua tahun 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATO' MUHAMMAD BAKHTIAR BIN WAN
CHIK [BALIK PULAU]**

TARIKH : 15 FEBRUARI 2023 (RABU)

SOALAN

DATO' MUHAMMAD BAKHTIAR BIN WAN CHIK [BALIK PULAU] minta **MENTERI KESIHATAN** menyatakan tahap ketersediaan Kementerian mengadaptasi digitalisasi di dalam sistem kesihatan yang mampu dicapai oleh golongan B40 dan M40 dalam usaha melicinkan urusan tadbir dan kepadatan hospital di negara.

JAWAPAN

Tuan Yang di-Pertua,

1. Pada 28 April 2022, Jabatan Perangkaan Malaysia (DOSM) telah menerbitkan Laporan Survei Penggunaan dan Capaian ICT oleh Individu dan Isi Rumah. Laporan ini menyatakan bahawa peratus capaian isi rumah kepada internet menunjukkan peningkatan kepada 95.5% pada 2021 berbanding 91.7% pada 2020. Pada 2021, capaian oleh isi rumah terhadap telefon bimbit dan komputer juga masing-masing meningkat kepada 99.6% dan 88.3%. Manakala peratusan individu yang menggunakan telefon bimbit mencatatkan peningkatan kepada 98.7% pada 2021 (2020:98.2%).

2. Merujuk kepada laporan tersebut, penggunaan internet untuk membuat janji temu dengan pengamal perubatan melalui laman web telah meningkat 43.5% pada tahun 2021 berbanding 10.7% pada 2020. Kesemua fakta ini menunjukkan ketersediaan dan capaian teknologi

kepada seluruh golongan masyarakat di Malaysia telah meningkat terutamanya pasca pandemik COVID-19.

3. Bagi Kementerian Kesihatan (KKM), matlamat pendigitalan sistem kesihatan adalah untuk memperkasakan perkhidmatan kesihatan digital secara bersepadu dan inklusif. Antara inisiatif KKM bagi menggalakkan golongan B40 dan M40 menggunakan sistem yang disediakan oleh KKM adalah:

- a. memperluaskan perkhidmatan konsultasi dalam talian menerusi klinik kesihatan KKM; dan
- b. menawarkan tempahan slot janji temu menggunakan aplikasi MySejahtera. Antara kemudahan urusan janji temu yang disediakan adalah bagi perkhidmatan vaksinasi COVID-19, perkhidmatan saringan kesihatan, perkhidmatan berhenti merokok, saringan pra-perkahwinan, perkhidmatan kesihatan ibu dan anak dan sebagainya.

4. Melalui perkhidmatan yang ditawarkan secara dalam talian ini, golongan B40 dan M40 tidak lagi perlu hadir ke fasiliti kesihatan kerana penyediaan kemudahan ini telah memudahkan urusan janji temu, perawatan kesihatan dan sekaligus dapat mengelakkan kesesakan di fasiliti KKM.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : TUAN MOHAMAD SHAFIZAN HAJI KEPLI
[BATANG LUPAR]**

TARIKH : 15 FEBRUARI 2023 (RABU)

SOALAN

TUAN MOHAMAD SHAFIZAN HAJI KEPLI [BATANG LUPAR] minta **MENTERI KEMAJUAN DESA DAN WILAYAH** menyatakan status terkini pembinaan Jalan Serandong, Perpat ke Paloh dan Batang Maro sepanjang 15 kilometer yang dalam proses rundingan dengan Unit Perancang Ekonomi (EPU).

JAWAPAN

Tuan Yang di-Pertua,

Untuk makluman Yang Berhormat, Projek Membina Jalan Serandong/Perpat/Paloh/Batang Maro, Bahagian Betong, Sarawak akan dilaksanakan dengan kos sebanyak RM117.0 juta. Skop projek ini adalah membina dan menaiktaraf jalan sepanjang 9.5km dengan spesifikasi JKR R2, jalan sepanjang 4.5km dengan spesifikasi JKR R1 serta dua (2) buah jambatan konkrit.

Projek ini telah sedia untuk ditender dan sedang ditentukan halatuju baharu pelaksanaan serta perolehannya yang akan diputuskan dalam masa terdekat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : PUAN ISNARAISSAH MUNIRAH
MAJILIS [KOTA BELUD]**

TARIKH : 15 FEBRUARI 2023 (RABU)

SOALAN

PUAN ISNARAISSAH MUNIRAH MAJILIS [KOTA BELUD] minta **MENTERI KESIHATAN** menyatakan jumlah klinik kesihatan yang akan dinaik taraf atau dibina baharu bagi tahun 2023 di Sabah dan status terkini cadangan pembinaan klinik kesihatan tahap tujuh di Pulau Mantanani, Kota Belud.

JAWAPAN

Tuan Yang di-Pertua,

1. Terdapat hanya sebuah klinik kesihatan yang telah diluluskan bagi tahun 2023 di Sabah iaitu Klinik Kesihatan Mansiat (Jenis 5) di Daerah Keningau. Kelulusan projek ini adalah bagi butiran kerja awalan iaitu melibatkan pelaksanaan kajian kesesuaian tapak dan penyediaan reka bentuk awal bagi mendapatkan anggaran kos keseluruhan projek.

2. Manakala bagi cadangan pembinaan Klinik Kesihatan Tahap 7 di Pulau Mantanani, Kota Belud, KKM telah mengemukakan permohonan semula menerusi *Rolling Plan* 4 Rancangan Malaysia Ke-12 (RP4 RMKe-12) bagi tahun 2024. Walau bagaimanapun, cadangan ini tertakluk kepada keutamaan pelaksanaan serta dan ketersediaan peruntukan Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

DARIPADA : YB PUAN WONG SHU QI [KLUANG]

TARIKH : 15 FEBRUARI 2023 (RABU)

SOALAN

PUAN WONG SHU QI [KLUANG] minta **MENTERI DALAM NEGERI** menyatakan status terkini siasatan tentang laporan Meta Platforms Incorporated yang menuduh PDRM terlibat dalam aktiviti akaun palsu di media sosial pada tahun 2022.

JAWAPAN

Tuan Yang Di Pertua,

PDRM memandang serius laporan pihak Syarikat Meta Platforms Incorporated yang mendakwa terdapat akaun-akaun palsu di media sosial yang mempunyai hubungan dengan pihak PDRM. Susulan laporan berkenaan, PDRM telah menafikan dakwaan tersebut.

Satu kenyataan media berhubung perkara ini juga telah dibuat oleh Setiausaha Polis Malaysia pada 5 Ogos 2022.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : JAWAB LISAN

**DARIPADA : TUAN HAJI AMINOLHUDA BIN HASSAN
[SRI GADING]**

TARIKH : 15 FEBRUARI 2023 (RABU)

SOALAN

TUAN HAJI AMINOLHUDA BIN HASSAN [SRI GADING] minta **MENTERI SUMBER MANUSIA** menyatakan apakah angka sebenar kadar pengangguran di Malaysia, ini termasuk golongan *fresh graduate* dan juga mereka yang berumur 60 tahun ke bawah.

JAWAPAN

Tuan Yang Di Pertua,

Berdasarkan Laporan Survei Tenaga Buruh oleh Jabatan Perangkaan Malaysia, kadar pengangguran negara pada November 2022 menurun sebanyak 0.7 mata peratus kepada 3.6% berbanding November 2021 iaitu 4.3%. Kadar ini adalah termasuk golongan siswazah dan mereka yang berumur 64 tahun ke bawah.

Bagi meningkatkan kadar penyertaan tenaga buruh serta mengurangkan kadar pengangguran khususnya di kalangan siswazah, Kerajaan telah mempergiatkan usaha mengadakan program melalui TalentCorp dengan fokus terhadap pembangunan kebolehpasaran dan kebolehkerjaan bakat muda negara melalui melalui sinergi dan kerjasama merentasi kementerian, jabatan, agensi Kerajaan, pemain industri dan

institusi pengajian tinggi awam/ swasta serta teknikal. Antara inisiatif tersebut ialah:

- (i) **Platform pemprofilan Mynext** dibangunkan untuk menganalisis penilaian psikometrik, penilaian 360 darjah pelaksanaan latihan industri (pelatih industri – majikan) dan intervensi solusi seperti bimbingan Kerjaya (*coaching & mentoring*) serta peningkatan kemahiran bakat muda.
- (ii) **Program Latihan Industri Berstruktur Nasional (National Structured Internship Programme - MySIP)** pula bertindak sebagai penggalak kepada penyertaan dan penglibatan lebih banyak syarikat dan industri untuk melatih bakat muda negara dengan membuka lebih banyak peluang penempatan latihan industri berkualiti melalui insentif potongan cukai berganda.
- (iii) **Kolaborasi Industri-Akademia (*Industry-Academia Collaboration*)** berperanan dalam memastikan institusi supaya lebih proaktif melibatkan diri dalam intervensi industri berdasarkan keperluan dan tahap ketersediaan institusi tersebut melatih bakat muda.
- (iv) **Young Employable Student (YES): We Are Ready!** dibangunkan selaras dengan keperluan graduan dalam negara dengan diberi pendedahan dalam meningkatkan kemahiran *soft-skills*, pendedahan kerjaya awal, tips kebolehpasaran graduan, tips kerjaya dan kesedaran kerjaya, *self-branding*, *self-awareness*, kepimpinan, program sukarelawan, program impak sosial, perancangan kerjaya dan peningkatan sendiri.

Kerajaan secara berterusan merangka dan melaksanakan pelbagai inisiatif merentasi kementerian dan agensi bagi membantu mengurangkan kadar pengangguran secara keseluruhannya termasuk di kalangan siswazah. Antara inisiatif yang dilaksanakan adalah seperti berikut:

- (i) Kementerian Sumber Manusia (KSM) melalui PERKESO telah menyediakan **platform MYFutureJobs** bagi menangani masalah ketidaksepadanan pekerjaan untuk siswazah selain memastikan peluang pekerjaan dikawal selia serta dibuka untuk semua golongan yang mencari pekerjaan. Portal berteknologi tinggi dan terkini ini membuat padanan pekerjaan berdasarkan kelayakan, kemahiran, pengalaman, gaji dan lain-lain mengikut keperluan majikan (*job matching*).
- (ii) KSM menerusi agensi di bawahnya seperti Jabatan Tenaga Manusia, Jabatan Pembangunan Kemahiran, HRD Corp dan PERKESO aktif dalam menawarkan dan menyediakan pelbagai **program latihan semula (*re-skilling*)**, **program peningkatan kemahiran (*up-skilling*)** dan **pembelajaran sepanjang hayat (*life-long learning*)** yang menjadi instrumen penting dalam membantu golongan pekerja termasuk siswazah dilengkapi dengan kemahiran yang bersesuaian dan terkini. Menerusi inisiatif ini, siswazah berpeluang mendalami kemahiran berkaitan pekerjaan mereka atau kemahiran baharu sebagai persiapan mencari pekerjaan lain.
- (iii) Selain itu, Kerajaan melalui HRD Corp juga telah menubuhkan **Placement Centre** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga 31 Disember 2022, sebanyak 44,109 peluang pekerjaan tersedia melalui platform ini di mana lebih 7,000 pekerja telah berjaya mendapat pekerjaan dalam pelbagai sektor seperti Perkhidmatan, Perkilangan, Borong dan Runcit serta lain-lain lagi. Daripada jumlah tersebut, sebanyak 60 peratus (4,200 pekerja) adalah daripada golongan belia dan sebahagian besar mereka memperoleh gaji sebanyak RM2,000 dan ke atas.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 15 FEBRUARI 2023 (RABU)

SOALAN

TUAN SYED IBRAHIM BIN SYED NOH minta **MENTERI KESIHATAN** menyatakan rancangan Kementerian untuk menaik taraf prasarana perkhidmatan kesihatan selain daripada menangani kesesakan Jabatan Kecemasan dan Trauma.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa komited dalam menambah baik kemudahan fasiliti kesihatan di seluruh negara menerusi inisiatif menaik taraf fasiliti sedia ada dan membina fasiliti kesihatan baharu berdasarkan faktor-faktor berikut:

- (i) kadar penggunaan katil (*bed occupancy rate* - BOR) yang tinggi;
- (ii) keadaan infrastruktur bangunan yang lama;
- (iii) kepadatan penduduk;
- (iv) keperluan perkhidmatan kepakaran;
- (v) akses kepada perkhidmatan di fasiliti sedia ada; dan

(vi) ketersediaan tapak yang sesuai dan sumber manusia serta kemampuan peruntukan kerajaan.

2. KKM sedia maklum akan isu kesesakan Jabatan Kecemasan dan Trauma di hospital-hospital KKM yang tertentu. Antara inisiatif yang telah diambil oleh Kementerian bagi menangani masalah ini adalah melaksanakan konsep *Lean Healthcare*, pendigitalan *Bed Management Unit* (BMU) secara berpusat melalui Sistem CPRC Hospital dan menyediakan kemudahan *Short Stay Unit* serta mengoperasikan Klinik Kesihatan dalam daerah tertentu secara lebih masa (*extended hours*).

3. KKM mengharapkan inisiatif-inisiatif yang dilaksanakan ini dapat menangani isu kesesakan di Jabatan Kecemasan dan Trauma hospital KKM. Selain itu, pesakit yang mengalami masalah kesihatan atau kes yang bukan kritikal juga disarankan untuk mendapatkan rawatan di klinik kesihatan yang berhampiran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATO' SERI HAMZAH BIN ZAINUDIN
[LARUT]**

TARIKH : 15 FEBRUARI 2023 (RABU)

SOALAN

DATO' SERI HAMZAH BIN ZAINUDIN [LARUT] minta **MENTERI LUAR NEGERI** menyatakan:

- a) pendirian terkini Malaysia berhubung konflik antara Rusia dan Ukraine di mana dunia menjangkakan serangan besar-besaran akan berlaku, dengan mengheret sama Belarus dan Poland sehingga memungkinkan perang berskala penuh terjadi di antara Rusia dan NATO; dan
- b) apakah pelan strategik Kerajaan PH-BN untuk berdepan kesan sosioekonomi dan politik akibat konflik tersebut, ketika mana Malaysia sedang bergelut dengan isu kos sara hidup serta inflasi.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Larut atas pertanyaan-pertanyaan yang dikemukakan.

Tuan Yang di-Pertua,

2. Sepertimana Yang Berhormat sedia maklum, Malaysia merupakan sebuah negara berdaulat yang berpegang teguh kepada prinsip berkecuali dan mencintai keamanan. Malaysia mendukung prinsip kedaulatan, keutuhan wilayah, kedaulatan undang-undang, dan menolak sebarang bentuk perbuatan berunsur kekerasan demi mencapai sesuatu objektif.

3. Pada waktu ini, Kerajaan percaya bahawa dialog dan rundingan berterusan adalah penting demi mencari penyelesaian terbaik untuk menamatkan konflik di Ukraine. Kerajaan akan terus menyokong usaha dan meneruskan dialog untuk menyelesaikan konflik secara aman demi mengekalkan keamanan dan keselamatan serantau serta antarabangsa.

4. Saya memahami kebimbangan Yang Berhormat berkenaan kemungkinan negara-negara Poland dan Belarus iaitu jiran kepada Ukraine akan turut diseret ke kancah konflik Rusia-Ukraine. Dalam apa-apa keadaan sekalipun, semua pihak mesti mematuhi dan menghormati prinsip kedaulatan dan keutuhan wilayah kesemua negara seperti yang termaktub di bawah undang-undang antarabangsa dan Piagam Pertubuhan Bangsa-bangsa Bersatu (PBB). Prinsip ini merupakan prinsip *fundamental* dan *sacrosanct*, serta asas utama kepada pendirian Malaysia menyokong resolusi-resolusi di Perhimpunan Agung PBB atau United Nations General Assembly (UNGA) dan Majlis Hak Asasi Manusia PBB atau Human Rights Council (HRC). Sebarang pelanggaran prinsip ini tidak boleh diterima sama sekali.

5. Akses kepada bantuan kemanusiaan dan laluan selamat kepada orang awam yang memerlukan perlindungan hendaklah ditekankan. Malaysia menggesa pewujudan platform yang kondusif bagi melancarkan proses penyampaian bantuan kemanusiaan. Usaha untuk melindungi kumpulan yang terjejas teruk terutamanya kanak-kanak, wanita, warga

emas serta golongan kelainan upaya harus diberi keutamaan. Dalam konteks ini, Kerajaan menyeru semua pihak untuk mematuhi norma undang-undang kemanusiaan dan hak asasi manusia antarabangsa yang sedia ada, serta menghormati pelaksanaan resolusi PBB.

Tuan Yang di-Pertua,

6. Kerajaan sedia maklum akan kesan ke atas sosioekonomi dan politik akibat konflik tersebut. Tidak dinafikan bahawa konflik Rusia-Ukraine telah memberi kesan kepada ekonomi Malaysia, sama ada secara langsung mahupun tidak langsung. Kerajaan telah melaksanakan langkah-langkah proaktif untuk mengurangkan kesan sporadik ke atas ekonomi negara akibat konflik Rusia-Ukraine. Antara lainnya, Kerajaan komited untuk melonjakkan prestasi perdagangan antarabangsa dan pelaburan negara dengan menggalakkan penerokaan pasaran baharu bersama negara-negara dagang yang tidak terlibat dalam konflik tersebut. Ini dilaksanakan melalui komitmen konsesi-konsesi tarif di bawah 16 perjanjian-perjanjian perdagangan bebas yang berkuatkuasa dan telah diratifikasi oleh Malaysia, khususnya dengan negara sumber bagi bahan mentah/ separa-mentah/ telah diproses industri pembuatan produk eksport Malaysia.

7. Selain itu, Kerajaan juga sentiasa menggalakkan industri tempatan untuk mempelbagaikan produk pengganti eksport (*export substitution products*) bagi merebut peluang-peluang permintaan pasaran baharu yang wujud akibat konflik tersebut. Dalam hal ini, Kerajaan masih berpendirian berkecuali dan tidak memihak kepada mana-mana negara supaya Malaysia tidak diheret ke kancah geopolitik dunia. Pendirian Malaysia ini adalah selari dengan kebanyakan negara-negara membangun lain, yang kebanyakannya telah terkesan dari sudut ekonomi mahupun politik akibat konflik yang berlaku ini.

8. Adalah menjadi keutamaan dan prinsip Kerajaan untuk sentiasa mengekalkan hubungan dua hala yang baik dengan semua negara. Komitmen negara ini adalah untuk memastikan kerjasama dua hala bersama negara-negara lain dalam pelbagai bidang diteruskan dan dipertingkatkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : TUAN OSCAR LING CHAI YEW
[SIBU]**

TARIKH : 15 FEBRUARI 2023 (RABU)

SOALAN

TUAN OSCAR LING CHAI YEW [SIBU] minta **MENTERI LUAR NEGERI** menyatakan mengapa tindakan tidak diambil untuk membantu menyelamatkan warga Malaysia yang ditipu dan diculik oleh sindiket *scam* pekerjaan di Kambodia. Mengapa kebanyakan mangsa harus membayar wang tebusan oleh keluarga untuk menyelamatkan anak-anak mereka. Mengapa *Special Task Force* tidak ditubuhkan untuk berunding dengan pihak Kambodia.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Sibu di atas pertanyaan yang dikemukakan.

Tuan Yang di-Pertua,

2. Izinkan saya menjawab pertanyaan Yang Berhormat Sibu bersekali dengan pertanyaan-pertanyaan yang dikemukakan oleh Yang Berhormat Sri Gading bertarikh 21 Februari 2023 kerana pertanyaan tersebut menyentuh isu yang sama.

3. Kementerian Luar Negeri (KLN) sentiasa prihatin dan memandang serius berhubung isu sindiket penipuan tawaran pekerjaan melibatkan warganegara Malaysia di luar negara. Untuk makluman Dewan yang mulia ini, selaras dengan keputusan Mesyuarat Jemaah Menteri pada 21 September 2022, satu Jawatankuasa Khas (*Task Force*) yang diketuai oleh KLN dan melibatkan agensi-agensi berkaitan telah pun ditubuhkan bagi menangani isu ini secara bersepadu dan menyeluruh. Ia adalah satu kesinambungan kepada usaha-usaha berterusan di antara pihak Kementerian dengan kerjasama Perwakilan Malaysia di luar negara dan Polis Diraja Malaysia (PDRM) yang bermula sejak suku pertama tahun 2022 lagi untuk menangani isu ini.

Tuan Yang di-Pertua,

3. Setakat 13 Februari 2023, KLN melalui Kedutaan-Kedutaan Besar Malaysia di Bangkok (Thailand), Phnom Penh (Kemboja), Vientiane (Laos) dan Yangon (Myanmar) telah menerima sejumlah 564 laporan mengenai warganegara Malaysia yang menjadi mangsa sindiket jenayah penipuan tawaran pekerjaan di luar negara. Daripada jumlah tersebut, seramai 401 orang telah berjaya diselamatkan, dengan 377 orang telah dihantar pulang. Baki seramai 24 orang yang lain sedang ditahan di depoh tahanan sementara menunggu proses pengusiran pulang, manakala 163 orang lagi masih sedang dikesan.

4. Negara yang mempunyai bilangan kes paling ramai dilaporkan adalah Kemboja dengan 277 kes. Ini diikuti dengan Myanmar 135 kes, Laos 92 kes dan Thailand 60 kes. Daripada jumlah tersebut, bilangan mangsa yang telah diselamatkan di Kemboja adalah seramai 247 orang, 37 orang di Myanmar, 68 orang di Laos dan 49 orang di Thailand.

5. Bagi warganegara Malaysia yang dilaporkan menjadi mangsa di sana dan masih belum dikesan, terdapat sejumlah 98 orang direkodkan di Myanmar, 24 orang di Laos, 11 orang di Thailand dan 30 orang di Kemboja.

Tuan Yang di-Pertua,

6. Tindakan-tindakan yang telah diambil oleh Perwakilan Malaysia termasuklah mendapatkan bantuan dan kerjasama daripada pihak kerajaan negara terbabit, mengadakan pertemuan dengan pihak berkuasa yang terlibat untuk mengesan serta menyelamatkan para mangsa serta memberikan bantuan konsular sewajarnya setelah mereka diselamatkan bagi membolehkan mereka pulang ke tanah air.

7. KLN mahupun PDRM tidak pernah menggalakkan pihak keluarga untuk membayar sebarang wang tebusan atau merujuk kepada pihak persendirian mahupun badan bukan kerajaan dalam mengendalikan perkara ini. Waris mangsa sentiasa disarankan untuk melaporkan kepada pihak PDRM, dan merujuk dengan KLN sekiranya waris beliau dikenal pasti terlibat dalam sindiket jenayah tersebut.

Tuan Yang di-Pertua,

8. Di kesempatan ini, saya ingin menasihatkan individu atau waris yang menjadi mangsa untuk membuat laporan polis terlebih dahulu bagi membantu siasatan. Individu yang menerima tawaran pekerjaan di luar negara adalah digalakkan untuk membuat semakan tawaran tersebut terlebih dahulu dengan Kementerian ini, Perwakilan Malaysia atau Kedutaan Negara yang berkenaan sekiranya khuatir atau was-was dengan tawaran yang diterima.

9. Seseorang individu juga perlu memastikan perjalanan keluar masuk ke sesebuah negara menggunakan Pasport Malaysia Antarabangsa dengan melalui pintu-pintu sempadan antarabangsa secara sah, selain memastikan visa pekerjaan diperolehi terlebih dahulu sebelum mengadakan perjalanan ke luar negara.

10. KLN akan terus memantau isu ini dan menghulurkan bantuan konsular yang sewajarnya dari semasa ke semasa kepada para mangsa. Dalam masa yang sama, warganegara Malaysia adalah digesa untuk sentiasa peka dan mengelakkan diri daripada menerima sebarang tawaran pekerjaan yang meragukan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATO' HAJAH SITI ZAILAH BINTI MOHD
YUSOFF [RANTAU PANJANG]**

TARIKH : 15 FEBRUARI 2023 (RABU)

SOALAN

DATO' HAJAH SITI ZAILAH BINTI MOHD YUSOFF [RANTAU PANJANG] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status bantuan peruntukan yang telah diumumkan oleh YAB Timbalan Perdana Menteri sebanyak RM12 juta pada 15 Disember 2022 untuk menyediakan enam unit pam bergerak berkuasa tinggi bagi mengatasi banjir termenung di jajahan Pasir Mas bagi menangani banjir termenung yang sering berlaku di jajahan tersebut khususnya di Rantau Panjang.

JAWAPAN

Tuan Yang di-Pertua,

1. Untuk makluman Yang Berhormat, Kementerian sedang membuat permohonan peruntukan dalam fasa 2 sebanyak RM12 juta bagi pembekalan enam (6) unit pam air berkuasa tinggi bagi mengatasi masalah banjir termenung di enam (6) lokasi di Rantau Panjang, Kelantan.

2. Walau bagaimanapun Kerajaan telah pun mengambil langkah proaktif dengan meletakkan sebanyak 33 buah pam bergerak sedia ada yang telah diagihkan kepada JPS Negeri Kelantan untuk kerja-kerja kecemasan. Di Parlimen Rantau Panjang, JPS Negeri Kelantan telah mengagihkan tiga (3) unit pam bergerak jenis hidraulik dan dua (2) set pam selam, lengkap dengan generator di sepanjang Sungai Golok. Di bandar Pasir Mas pula, satu (1) unit *End Suction Pump* telah disediakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : JAWAB LISAN

**DARIPADA : YB DATO' HAJAH MUMTAZ BINTI MD NAWI
[TUMPAT]**

TARIKH : 15 FEBRUARI 2023 (RABU)

SOALAN

DATO' HAJAH MUMTAZ BINTI MD NAWI [TUMPAT] minta **MENTERI DALAM NEGERI** menyatakan apakah perancangan Kerajaan untuk membina fasiliti dan prasarana yang lebih komprehensif di Pengkalan Kubur sebagai Pintu Masuk Antarabangsa.

JAWAPAN

Tuan Yang Di Pertua,

Kementerian Dalam Negeri melalui Jabatan Imigresen Malaysia sentiasa meneliti keperluan naik taraf kemudahan imigresen di pintu-pintu masuk dari semasa ke semasa termasuklah di Kompleks ICQS Pengkalan Kubur. Kementerian ini sedia maklum tentang kepentingan prasarana di sempadan dalam menjana ekonomi setempat serta memberi pulangan tukaran wang asing kepada negara. Dalam hal ini, JIM akan memastikan prasarana ini berada pada tahap optimum dan membolehkannya bertindak sebagai *enabler* dalam merancakkan ekonomi di kawasan tersebut.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KELIMA BELAS, TAHUN 2023**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 15 FEBRUARI 2023 (RABU)

SOALAN

TUAN M. KULASEGARAN [IPOH BARAT] minta **MENTERI SUMBER
MANUSIA** menyatakan :-

- (a) Sama ada Kerajaan berhasrat untuk menjalankan audit forensik terhadap skandal Penjana Kerjaya. Kalau tidak, kenapa tidak ; dan
- (b) Nyatakan jumlah wang yang digantung oleh sebab skandal ini dan telah dikeluarkan kepada pihak yang menuntut.

JAWAPAN

Tan Sri Yang di-Pertua,

Kementerian Sumber Manusia dan PERKESO sentiasa memandang serius berhubung kes penyelewengan dana dan tuntutan palsu termasuk skandal Penjana Kerjaya. Oleh itu, audit forensik dalaman telah dan sedang dijalankan terhadap isu berkaitan Penjana Kerjaya ini dan ianya merupakan proses yang berterusan.

PERKESO dari semasa ke semasa melaksanakan penambahbaikan kerja dan memastikan gerak kerja adalah mengikut tatacara yang ditetapkan serta melakukan kerjasama secara berterusan dengan pihak yang berkuasa. Antara langkah proaktif yang dilakukan oleh PERKESO adalah melakukan analisa data dan menyerahkan segala maklumat kepada pihak Suruhanjaya Pencegahan Rasuah Malaysia (SPRM) termasuklah isu penyalahgunaan maklumat individu untuk tuntutan insentif di bawah Penjana Kerjaya mahupun tuntutan faedah di bawah Sistem Insurans Pekerjaan untuk tindakan selanjutnya.

Selain itu, PERKESO juga memperkenalkan syarat seperti majikan yang berdaftar sebelum program Penjana Kerjaya sahaja yang layak diumumkan untuk membuat permohonan. Di samping itu, majikan juga perlu membuat caruman kepada KWSP dan PERKESO bagi tindakan penguatkuasaan.

PERKESO juga turut melaksanakan pemantauan secara berterusan dengan membuat pemeriksaan secara rawak ke atas majikan dan penyedia latihan, mengadakan lawatan mengejut dan risikan terhadap pihak-pihak yang terlibat dari masa ke semasa. Sekiranya PERKESO mengenalpasti sebarang keraguan ke atas majikan atau penyedia latihan, beberapa tindakan akan diambil seperti;

- i. Permohonan tersebut akan disemak dan diteliti semula dengan lebih terperinci dengan menggunakan analisa data sebagai satu proses tapisan tambahan;

SOALAN NO: 61

- ii. Menghentikan sementara bayaran kepada majikan atau penyedia latihan yang terlibat;
- iii. Majikan dan penyedia latihan akan disenarai hitam daripada membuat sebarang permohonan insentif PERKESO dalam fasa siasatan dilakukan; dan
- iv. Melakukan pemantauan berkala serta kerjasama dengan pihak SPRM bagi memastikan mana-mana majikan yang disyaki menipu, memberi maklumat palsu dan seumpamanya dalam permohonan akan diambil tindakan dari semasa ke semasa.

Berdasarkan statistik Sistem Insurans Pekerjaan (SIP) PERKESO, **Jumlah bayaran yang digantung** oleh PERKESO adalah sebanyak RM13,955,883.26 atau RM13.96 juta bagi Penyedia Latihan dan RM204,150,012.1 atau RM204.15 juta bagi majikan. Jumlah wang yang dituntut bayaran balik adalah sebanyak RM11,464,329.60 atau RM11.46 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

DARIPADA : PUAN RODZIAH BINTI ISMAIL [AMPANG]

TARIKH : 15 FEBRUARI 2023 (RABU)

SOALAN

YB PUAN RODZIAH BINTI ISMAIL [AMPANG] minta **MENTERI PEMBANGUNAN KERAJAAN TEMPATAN** menyatakan apakah perancangan untuk merangka semula Dasar Perumahan Negara memandangkan golongan B40 amat tertekan oleh pelbagai kekangan terutama ketidakmampuan membeli atau menyewa kerana pendapatan terlalu rendah dan/atau harga pasaran terlalu tinggi; kesukaran mendapatkan pinjaman; kesan konsep “bayar dahulu, nikmati kemudian” jika projek terbengkalai.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pembangunan Kerajaan Tempatan (KPKT) sedang mengkaji semula Dasar Perumahan Negara (DRN) (2018 -2025). Kajian semula dasar perumahan ini adalah berdasarkan rangkuman inti sari membangun Malaysia Madani supaya hala tuju dasar ini dapat diterjemahkan dalam bentuk nilai kesejahteraan dan keseimbangan untuk semua golongan rakyat Malaysia. Intisari Madani ini akan diterapkan di dalam DRN bagi memastikan perumahan yang dirancang adalah:

- (a) mampan dalam menyediakan akses dan perumahan mampu milik dengan perkhidmatan asas yang mencukupi untuk setiap golongan bagi memastikan kehidupan yang terjamin;
- (b) mampu menerapkan daya cipta dalam menyediakan rumah mampu milik yang lebih berkualiti dengan cara yang lebih kos efektif; dan
- (c) memastikan penglibatan rakyat dalam merencana pelan perumahan yang bersepadu, khususnya bagi menyuburkan nilai hormat dalam sesebuah komuniti.

KPKT juga turut mengambil inisiatif dengan pihak-pihak berkepentingan seperti penubuhan Panel Berkepakaran Perumahan (Panel of Expert) dalam memanfaatkan pengalaman dalam usaha melaksanakan kajian semula DRN. Dalam memastikan agenda perumahan negara dapat direalisasikan melalui DRN ini, terdapat lima (5) aspek yang menjadi fokus KPKT iaitu Ketersediaan (*availability*), Kemampuan Kewangan (*affordability*), Kemudahan Pembiayaan (*accessibility*), Kualiti (*quality*) dan Kediaman Berdaya Huni (*liveability*). Kesemua aspek ini dilihat sebagai komponen penting dalam penyediaan kediaman yang mampu milik dan berkualiti sehingga aspek pemilikan atau sewaan di kawasan kejiranan yang berdaya huni.

SOALAN NO : 62

Peningkatan aksesibiliti perumahan turut menjadi fokus Kementerian ini sebagai salah satu agenda dalam Dasar Perumahan Negara supaya ia memenuhi keperluan rakyat. Pelaksanaan Program Pemilikan Kediaman atau Home Ownership Programme (HOPE) oleh Kementerian ini dapat membantu bagi merealisasikan hasrat kerajaan dalam meningkatkan pemilikan rumah di kalangan rakyat. Di bawah program HOPE, KPKT dengan kerjasama Kementerian Kewangan telah memperkenalkan Inisiatif Pembiayaan Perumahan Malaysia (i-Biaya) yang telah dilancarkan pada 14 April 2022 yang menawarkan tiga (3) jenis skim pembiayaan kepada kumpulan sasaran.

Selain itu, Program Karnival Jom Beli Rumah (KJBR) telah dilaksanakan sebagai satu lagi inisiatif bagi mempromosikan pelbagai insentif dan tawaran yang disediakan oleh Kerajaan dan pemain industri untuk memiliki kediaman yang diidamkan. Sehingga ini, terdapat dua (2) siri Jelajah HOPE dan KJBR telah diadakan di Lembah Klang dan Wilayah Utara.

Penelitian semula DRN ini turut mengambil kira perancangan yang lebih teratur termasuk sasaran penyediaan 500,000 unit Rumah Mampu Milik (RMM) menjelang tahun 2025. Selain itu, penelitian ini turut memberi penekanan terhadap agenda pemilikan rumah di Malaysia yang sentiasa memberi tumpuan kepada akses terhadap perumahan-perumahan yang berkualiti dan mampu dimiliki sejajar dengan konsep Malaysia Madani.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS 2023**

PERTANYAAN : LISAN

**DARIPADA : DATO' DR. ALIAS BIN RAZAK
[KUALA NERUS]**

TARIKH : 15 FEBRUARI 2023 (RABU)

SOALAN

DATO' DR. ALIAS BIN RAZAK [KUALA NERUS] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status terkini permohonan projek tebatan banjir di Sungai Tepoh, dan Saliran Banggol Air Lilih.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian akan memohon projek tebatan banjir di Sungai Tepoh, dan Saliran Banggol Air Lilih di bawah *Rolling Plan* 4 (RP4), Rancangan Malaysia ke-12 (RMKe-12).
2. Selain itu, Jabatan Pengairan dan Saliran telah melaksanakan kerja-kerja kecil di Parlimen Kuala Nerus pada tahun 2022 berjumlah RM 949 ribu di bawah Rancangan Malaysia Ke-12 iaitu:
 - i. Kerja-kerja pemuliharaan sungai untuk mengurangkan risiko banjir berjumlah RM850 ribu; dan
 - ii. Kerja-kerja kecemasan luar di luar jangka berjumlah RM99 ribu.

Sekian, terima kasih.